

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijijaariuhuj. ² Jiya coteesacari, nojuajaari na Que Pueyasota quiriquiaa. ³ Na Queeri na shipiniquiaari puetunu casaajanaa. Puetunu casaajanaari na shipinishano. Maja tamonu shipinia quiniu socua. ⁴ Nojuajaari quijiajuhuanajaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniurijuhuj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijiona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niqiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucanejojua quiquiaari. Pueyari tama nojori Shipinijajaaja niishiyaquiquiaari. ¹¹ Tama na saquiriojosano Israel pueyacua niqiaariiri. Nojoriiri na tamacaquiaari saaja. ¹² Saaja noojiaqueya

pueyari nocua tiuquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiushacari saaja.

¹⁴ “Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo. Canaata quiquiaariiri. Canaari na cumaacata na mijiosano niqiquiaarini. Jiyanohua maninia quiquiaariiri. Na Que Pueyasoori na cumaquijia jiyanohua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanojia quijiaari. ¹⁵ Tiuquinijiona Juanri Jesucristojiniji pahuataquiaari pueya niqiara. Jiyanohua na rupaa paaretaquiaariiri pueya tojitianura nojuaja. Naa sequejaari:

—Janiyacujaari nojuajiniji nia pahuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijajanaa cutara janiyajiniji. Nojuajaari tari quijia cua quiyaquishacarijia.

Juanri naa pahuataquiaari Jesucristojiniji.

¹⁶ Jiyaniijajanaa Jesucristo quiniucua, puetunu pajaniyajanaari na jiitiasanojiniji masequiaani. Jiyanohua capora na quiniuucua, nojuajaari pueyaracaanu pa cumaquiquiaa. ¹⁷ Pueyasoori supetana Moisés naajiotequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuuja, pa panijia Pueyaso quiniuucua, nojuajaari Neyanujuanaa jiyaroquiaari pocua, pa jiyanooshaanura, naajuhuj, seetanu rupaajanaa pa niishiniuria nojuajiniji. ¹⁸ Majaari

quenaaja tamonu pueyano niqiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishitioquiaari.

Tiuquinijiona Juan pohuatasano Jesucristojiniji

(Mt 3.11-12; Mr 1.7-8; Lc 3.15-17)

¹⁹ Jerusalén tiacajinijinio canaa Judiocuaca camaru-cuaari na pueya jiyaramiquiquiaari Tiuquinijiona Juan-cua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niqiuohuacuajinio supueno pueya. Noojiaqueya cuno pojorijinijinioori quiquiaarijiuhua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujuanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniani? ¿Quiaa jiyoteeri Pueyaso sequesano caminiujiunia Elías soj? ¿Quiaa jiyoteeri samitiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuhuj:

—¿Quiaa jiyoteeri Pueyaso sequesano caminiujiunia, noj tariucuaaanu sequesaaquiaari niriqianotej?

Juanri saaja nojori riucuaaree:

—Maja.

²² Cuno pueyari socua na sequere:

—Canaa quia pohuatareja, ¿cante quiajaniani? Canacua saniniuujia canaa camarucua pohuatasuhuanijia.

²³ Juanri saaja naa nojori riucuaaree:

—Janiyacujaari nooni, cariiquia jiyajinia nacajatej, taa supuetana Isaías juhuacarjia naajiotaquiaari janiyajini-jicujani: “¡Jiyaniijiaacuaji nia nuunore maninia! ¡Maja shuutiuniu!”

²⁴ Jiyacaritij, Fariseocuaca camarucua jiyaramiquis-hano pueyari Tiuquinijiona Juan nequesotaree:

²⁵ —Quiaa jaara quiyaquiri Cristo, Elíasjuhuaj, cuno tariucuaaanu sequesaaquiaari niriqiano Pueyaso sequenu panishano caminiujiuniatej, ¿casaara pueya quia tiuquinijiya moojinacuaraarini?

²⁶ Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quiya, nia niishiyaquishoojua.

²⁷ Nojuajaari cua nuhuaji niniutianiya. Nojuajaari Jiyaniijijajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyaniishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniyojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura!

³⁰ Janiyacuajaari nojuajiniji nia pahuatajani janiya jaara nia sequejani: “Cua nuhuaji niniutianiyari Jiyaniijijajanaa cutara. Nojuajaari tari rishijia cucuaji cua quiyaquishacarjia”. ³¹ Janiyari na niishiyaquijijajuhuj, cante nojuajani. Naajaa, janiyari parta Israel pueya

tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhujaj:

—Janiyari Pueyaso Sohuanu niqiriucuaani jiyocua-caanuji roseyano nocua juhua mococoonu. Nocua tiu-ushiiri. ³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niqiri pueyanoocua roseyano, nocua na tiuuniuria, quiocua niishiri, cunocujaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni. ³⁴ Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, ¡nojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohuatasano

³⁵ Tariqui, Tiuquinijiona Juanri tii quishiiquihua caapiqui na pueyata. Janiyari niqiriyatu cuno caapiqui pueyanojinijinio quiriqiaaani. ³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niqiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia sequejeequesaanura.

³⁷ Naa canaa tojishacari Juan sequesanotej, canaari Jesu nuhuajiquiaarini. ³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹ Jesuuri canaa riucuaaree:

—Miji. Nia niquiquii.

Canaari nata quiaareeni. Canaari na quijia niquitiushiini. Tari pananu piriushacariiri quiriquiaa jiyacari. Cunora, canaari tii maquetusee Jesutani.

⁴⁰ Tiuquinijiona Juan niquitiniucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jitiiaja. Na sesaari quijia Simón Pedro.

⁴¹ Tariquicuaji, Andrésri ritia tarajanu Simón pajenuucua quiaquiaari. Na riuriasacari, na sequereeri:

—¡Cua tarajanunaa, canaari Cristo niquiriquiacuaani, tariucuaaanu Pueyaso sequesano na jiyarosocoriquianotej!

⁴² Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelnio

⁴³ Tariqui, Jesuuri Galilea jiyajiniara quiariquiaa. Felipe riuriasamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajinijinio quiquiaari. Andrésri tarajanu Pedroti cuno tiacajinijinio quiquiaarijuhuj. ⁴⁵ Na nuhuaji, Felipeeri Natanael pajeree. Na riuriasacari, na sequereeri:

—¡Canaa noo pueyano niquiriini, Moisés nojuajiniji naajiotaquiaari tariucuaanutej! Tariucuaaanu Pueyaso sequesano caminiujiunaa pueyari nojuajiniji naajionuutaquiaarijuhuj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riuuareejaa:

—¡Jaj! ¿Na naatate maninia miijia pueyano supuenujuuara cuno sesa miijiaca Nazaret tiacajiniji?

Felipeeri na sequeree saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquiohuacuajinio supuenojuanaa cutara. Majaari na niishiniu sapojonu.

⁴⁸ Natanaelri na sequeree:

—¿Taa quia niishiya janiyarini?

Jesuuri na riucuaeree:

—Felipe sequeyaquishacarijia quiajaniya cucua quia niniuria, janiyari tari quia niquirii coojiatani, higo naana pajama tateyano.

⁴⁹ Natanaelri shiriiquirii. Jesu sequereeri:

—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyaniijiaranojuhuaj!

⁵⁰ Jesuuri na sequeree:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niquiniutianiya cutara.

⁵¹ Jesuuri cuniqui quiniaa pueya sequereeejuhuaj:

—Seetanujuanaa nia sequeyanijia, niaari jiya cajiniocua niquiniutianiya riateno. Pueyano cua quishacari, niaari Pueyaso seya niquiniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masuusano pueyari queranacuriquiaa. Jesu nucuaari tii quiriquiaajuhuj. ² Jesuuri na saquiriojosano pueyata masu-usaaquiaarijuhuaj, camishacari queranacunura. Janiyari

na saquiriojosano pueyano quiriquiaa jiyacari tarijuhuaj.
³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuaj. ⁴ Jesuuri na nucua riucuaaree saaja:

—Maajiniaa, ¿casaara quia sequeya janiyani? Juhuanajuaja maja cua poonijiosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

⁶ Tii cajitiuriquiaari seis conatu, saajiajiniji quejasano. Canaa Judiocuacaari sequeyarucua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niquiara. Nojori mohuaca cajitiacojua quiquiaariirri cuno conaa. Jiyanohua puereetucocua quijiaari. Cuno conatuuri setenta tumococua mishaja mohuacata mishinishano quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioore. Mohuacaari conaa rupaacuma puecacosee. ⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaa-ree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijioore cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereeri:

—Pueyaruhuatijia coteenu raateja shocuanacu vinote. Puetunu masuusano pueya jaara tari raruure queraatia,

na nuhuaji raatesano cutaraari shaarunacu vino. ¡Quiaria saniniuujia, nio cua ratasanoni, cunoori socua manini-uniacu vino coteenu quia raatojotesanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niquitiquiaari Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuanaa Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapueyocuacatajuhuaj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niquitiojonaa Pueyaso Secojojua tiajiniji

(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuj. ¹⁴ Na tiuquishacari, Pueyaso Secojojua tiajinia quiamaari. Tii niquishii pueyari juyaca niquitiojiyano Pueyasoocuara puecoosocoriquiano, borregohua, noseyanio. Pueyari tii na juhuacutucujinia caji-tiuriquiaajuhuj, pueya na tacatojonura taucuaca cumaneeca, Pueyaso Secojojua tiajinia niquitiojosocoriquiano cumaneecara. ¹⁵ Naa na niquishacari pueya miyano Pueyaso Secojojua tiajiniatej, Jesuuri seya morojotaja jiyocua tatucuaaree. Na majacutajara na shitiareeri. Cunota, puetunu nojorijianaa jaacaree Pueyaso Secojojua tiajinijiiri, puetunu nojori borregohuatajanaa, mariyata puetunu nojori juyacatajanaano. Cumaneeca rerecojoree jiyocuara juhuacutucujinijiiri. Najujuhuaj, cumaneeca juhuacutucua caponeetareeri. Pojotaariquiaacuara. ¹⁶ Noseya niquitiojonaa pueya sequeeri:

—¡Niiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquini, seetanujuanaa tariucuacaanu Pueyaso Rupaajinia naa naajiotasanoori quiya:

“Quia tiaacua juaatishaaree jiyanoahuanijia, jiyanohua cua panishacari quia tia”.

¹⁸ Naa Jesu miiniuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutiricuaraja Pueyaso cumaacata quia miishano, canaa niishiniuria quiaari seetanujuanaa Pueyaso Jiyarosano!

¹⁹ Jesuuri nojori riucuaaree miriqui:

—Pueyaso tia nia niyartare, janiyacua saaja jiuujianaraca juucajinia na tucuatrohua tianu tamajaajani.

²⁰ Narta Judiocuaca camarucuaari na riucuaaree:

—¡Cuarenta y seis marijiaari shoconujuquiaari pueya tucuatnura nio secojojua tia! ¿Quiaateeri jiyaniya quia naata na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari.

²² Naacuajitij, Jesu jaara samiitiaquiaariuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari jooca juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijosano niqiuquiaari. Naaratej, queraatia pueyari nocua tiuquiaari. ²⁴ Naajaa, majaari Jesu tiuuniuquiriquiaa seetanujuanaa nojoriicua. Nojuajaari nojori

niishiriquiaa, taamueca pueyate nojorini. ²⁵ Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucujinijinio quijia, Fariseocuaca maanujinijinio-juhuaj. Tojishano pueyano. ² Jesuucua na tiuquishacari, naa na sequeseeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³ Jesuuri Nicodemo sequeree:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jiitianura nojuaja.

⁴ Nicodemoori Jesu nequesotaree:

—¿Pueyanotucua taa rasaanuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuuhara.

⁵ Jesuuri na riuuaree:

—Seetanujuanaari cua sequesano. Cua tojiri. Paari coteenu rasaaquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jiitiasanoniyojua na quiniu quiniutianiya. ⁶ Mijiria pueya muetusanoori saaja pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano.

⁷ Naaratej, majaari quia shiriiquiniu puera, naa cua sequenuucua quiajaniatej, quiaa cuara rasuhua, seetanujuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaajaaniuhuj. Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuhuj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucaaree:

—¿Majateeri quia niishiniu cua sequesano quiajanिया? Quiaari Pueyaso Rupaa niishitiojonacujaja Israel pueyara. ¹¹ Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari nijaniya seetanu rupajaanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuhuj, janiyari macaacua nujuaretasocoriquianoni. ¹⁵ Naacuajitij, puetunu cucua tiuuniaajanaari pueyaracaanu quijiaca quiniutianiya.

Pueyasoori puetunu mijiria quiniaa pueyajanaa panijia

¹⁶ Jiyanhua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa

jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ 'Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya. ¹⁹ Janiyari mijiria niquiaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniucua. Sesa miijiaca nojori quiniucua, majaari nojori paniniu cuhuatasano nojori quiniuria. Naaratej, nojori-iri saniitiosaanutaniya. ²⁰ Puetunu sesa miijiacajanaari cua niquiniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya na Rupaa-jiniacuajani, nojoriiri cuhuashiqui quiniu panijiaa cutara. Nojoriiri cucua nijioquiaa na niishishaanura nojori miishano cutaraari puetunu maniniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj

tiuquinijosano nojori quiniuria. ²⁴ Juanri jiyacari nuju-atejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojoriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiqianu Jordán moo taquijiriatej, nojuajana pueya tiuquinijiyajuhuj. Puetunu pueyajanaana nocua quiojiya tiuquinijosano nojori quiniuria.

²⁷ Tiuquinijiona Juanri nojori riuquaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajanियacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹ Pueyano rupuena jaara camiya necocuara, quiarjia cutara necocuaari seetanujanaa saaja nerano. Naajaa, na rupuena quishacari na shuri-ucua, na timitiaari na tojishacari necota pocoojiyano shuquiriaatia. Naajuhuj, janiyari cunora shuquiriaatia quiarjia quiyani pueya rupuesacari Jesucristo. ³⁰ Janiyari cunora jiyarosaaquiaaricujani, pueya cua tojiniuria nojuaja. Naaratej, pueya cuaara carteera janiya, Cristoocua nojori pacunura saniniuujia, nojori tojiniuria nojuaja. ³¹ Cante jiyocuacaanuji niquiaaricujani, nojuajaari Jiyaniiijajanaa cutara. Janiyari saaja mijiria quiniani. Cunora, cua pohuatasanoori saaja mijiria cua tojishano. Jesucristo saniniuujia, nojuajaari jiyocuacaanuji ninio cutara. Nojuajaari Jiyaniiijajanaa. ³² Naacujitij, na pohuatasanoori tama na niquishanojuaja jiyocuacaanu, na tojishanonio. Pueyari na pohuatasano cuaracashitiquiaa saaja. ³³ Canapuate Jesucristo pohuatasanoocua tiuujiacani, nojoriiri sequeya, seetanujanaaqui Pueyaso sequesano Neyanujiniji. ³⁴ Pueyasoori jiyanojua queraatia

na Sohuanu niqutioquiaari na Jiyarosano. Naacuajitij, seetanu Pueyaso rupaajanaa pohuataari. ³⁵ Pueyasoori jiyanoehua panijia Neyanu. Naaratej, nojuajaari na jiyatequiaari puetunu casaa jiitianarajanaa na quiniuria. ³⁶ Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuate Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitiosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinijinio maajitia

¹ Fariseocuacaari pohuatasaaquiaari, jiyanoehua queraatia pueya Jesuucua quiojiya na tojitianaa nojori quiniuria. Nojoriiri pohuatasaaquiaarijiuhuj, Jesuuri socua queraatia pueya tiuquinijia Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriquiaa pueya. Saaja canaa cutaraari pueya tiuquinijioriquaani. ³ Jesu jaara niishiquiaari Fariseocuaca naa pohuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriquiaani. ⁵ Naa canaa quiasacari nucuacotej, canaari Sicar tiacajinia tiuquishiini, Samaria jiyajinia. Cuniqiji, cateca quiriquiaari supuetana José cuhuariquia, na que Jacobo niquticosano nojuaja. ⁶ Cuno cuhuariquiajinia quiriquiaari cuari, supuetana Jacobo jiuutiasano tariucuacaanu. Pueyaracaanu Jesu rucuanenuucua nucuamaji, nojuajaari cuno cuari shuriucua cajishii na samareenuta. Panacariiri quiriquiaa. ⁷⁻⁸ Jiyacaritij, canaari tiacajinia quiamaani canaa miaquesocoriquiano canaa masenura casaa. Canaa niyacari,

cuno Samaria tiacajinijinio maajiiri cuarimia quiaquiaari mohuaca taquitianura. Jesuuri na sequeree:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacujaari Judio.

Cuno maajiiri naa sequeree Jesutej, na niishiniucua Judiocuacuajaari maja na niqiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiitaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianijia mohuacani.

¹¹ Maajiiri na sequeree:

—Jiyaniijanaa, majaari quenaaja quia jiitianu casaa, mohuaca quia taquiriatajara. Nio cuariiri jiyanhua tucuaa. ¿Quiaatucua teje taquitiare cuno mohuacani, pueya samiitianijiani? ¹² ¿Quiaateeri jiyaniijajanaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyano.

¹³ Jesuuri na riuquaree miriqui:

—Puetunu nio cuarijiniji ratujuacajanaari saaja jiyamuecoquiaa. ¹⁴ Saniniuujia, cante cua mohuaca ratunutaniyani, majaari socua na jiyamueni quiniutaniuhua. Cua mohuacaari juhua samo naca pacartanutaniya pueyaracaanu nojiajinia, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¿Pueyanonaa, cuno mohuaca cua niquitiore cua ratusocoriquiano, maja socua cua jiyamuenura, naajuhuj, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequecoo coteenu.

¹⁷ Maajiiri na riucuaaree:

—¿Janiyate niyacaracajaarani, quiaa jaara naa cua sequere?

Jesuuri na sequere:

—Quiaacuajaari seetanjuanaa cua sequere: “Niyacaajunijia”. ¹⁸ Seetanjuanaari. Quiaari tari cinco niyacaraca quiquiaari. Mariyata cuno, quiarijia quiata quiyani, majaari quia niyacajuhuj.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijiana, ¡quiaaqui Pueyaso sequenu panishano caminiujiunia! ²⁰ Canaa supuetanaa pueyari niya nio tuhananuucua Pueyaso secojonuujua tarijia. Niajaniya saniniuujia, Judiocuacani, niari sequequiaa Pueyaso cuara secojosaaria saaja Jerusalén tiacajinia.

²¹ Jesuuri na riucuaaree:

—Seetanjuanaa quia sequereera maajiniaa. Cua sequesanoocua quia tiurii. Quera quiniutianiyari Pueyaso nia secojosacari puetunu tiquiyocua nia quishacarijianaa. Majaari tari Pueyaso secojosaanu quiniutianiya saaja Jerusalén tiacajinia, nio tuhananuucujuhuj, taa quia sequereecujani. ²² Niajaniyari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocujaari canaa Judiocuaca supuetanaa niishitioquiaari pueyacuaji Tacunaari supuenutaniya tama canaa Judiocuacajinijiniojuaja. ²³ Quiarijia cutara, cante seetanjuanaa Pueyaso shuquiritiajani, nojoriiri na Que Pueyaso secojonutaniya puetunu nojiatajanaa, seetanjuanaa na tojijaca nojori quishacari. Pueyasoori naa paniya pueya secojonura nojuaja, cante na secojonuujuacacujani. ²⁴ Pueyasoori sohanu. Naaratej, cante

Pueyaso shuquiritiniu panijiacani, nojori cuaara secojoora Pueyaso puetunu noojiatajanaa, Pueyaso Sohuanu tojjijaca nojori quishacari.

²⁵ Cuno maajiiri Jesu sequeree:

—Janiyacuajaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacuajaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuaní. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuaja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuaaj, cua tucuatascari na panishano. ³⁵ Niaari sequequiaa: “Cuaara shocojorajaara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatare maninia nia niquiniuria. Nataacuacacuaaja tari noshiquia, carojotasocoriquiano. ³⁶ Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacuajitij, cuhuariquia natoonaari jatiqui shuquiriniutianiya nataacuaca carojotanaata. ³⁷ Naaratej, seetanujuanaari nio tariucuacaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuuja na carojotaja”. ³⁸ Janiyari saniniuuja nia jiyaramiquiquianuni nataacuaca nia carojotanura quenaaja nia poonijiyaquishoo cuhuariquiajinia. Cunoori tamasa poonijosano quiquiaari. Niaari juhuajaniya tamasa poonijosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinoori Jesuucua tiuuquiaari, nojori tojishacari naa cuno maaji sequesantej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinoori Jesuucua tiuuquiaari, nojorijianaa jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeturee:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canacuajaari tama canaa numaatajaaja tojirii na pohuatasanoni. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quiniaa pueyajanaanio.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataaree Galilea jiyajiniara. ⁴⁴ Jesuuri tarijia sequequiaari: “Nio tariucuacaanu sequesanoori seetanujuanaa sequesano. Naa sequeyari: ‘Pueyaso sequenu panishano caminiujiuniaari maja tojishano quijia tama na jiyajiniajaaja’ ”. ⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojoriiri naa maninia na tiuquitiquiaari tari nojori niquiniuucua Jesu miishano na cumaacata Jerusalén tiacajinia, Pascuara nojori queranacuscacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracuajani. Jiyacaritij, Capernaum tiacajinia quiquiaari iri tamonu pueyano, Galilea jiya jiyaniijia jiyatesano camarnura. Cuno pueyano niyanuuri jiyanohua cusosu matariquiaa. ⁴⁷ Cuno camarnu jaara niishiquiaari Jesu tari tiuquiriohua Judea jiyajiniji, nojuajaari jiyacari niquiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeeseeri:

—¡Jiyaniijianaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riucuaaree:

—Niaa jaara cua cumaacata cua miishano niquiyaquiri, niaari cucua tiuyaquiquiaa.

⁴⁹ Cuno camarnuuri saaja Jesu sequeree:

—¡Jiyaniijianaa, mijijijaj, jati pa quiaare cua tiajinia, quiyanu cusoyaquishacarijia!

⁵⁰ Jesuuri na sequeree:

—Quia quiaarohua. Quia niyanucujaja tari naatarohua. Cuno camarnuuri Jesu sequesanoocua tiuuri. Quiaarohuari. ⁵¹ Jiyacari na tiajinia, na seyari niquiquiaari

camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenu-ucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riuacuaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuurii, puetunu neco-huatajanaanio.

⁵⁴ Judea jiyajiniji Jesu tiuquishacariuhuj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca querana-cusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj. ² Jerusalén tiacaari puetunujuanaa puereetuuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco. ³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiju-niaa, cumatacuruhuana cusosuhanio. Nojoriiri mo-huaca sashijia cuara queyaquetesaaria. ⁴ Pueyaso

seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajuhuj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishiriijaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocujaji Jesuuri na sequereé:

—¿Quiaate naatanu paniya?

⁷ Cusosuuri na riucuaare:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuani, cuarta cusosuuri saaja cua shocotaquiaani.

⁸ Jesuuri na sequereé:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujaj!

¹¹ Cusosu naatanohuari nojori riucuaare:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuaareeri:

—Johuj. Maja cua niishiniu canaquitijia cua naataniritij.

Jesu naatanishacari cuno pueyano, queraatia pueyari namitia tii quiriquiaa. Naacuajitij, Jesuuri ritia tajiniocua-reequiaari pueya tajinia, na naatanishano pueyanoocuaji.
¹⁴ Na nuhuaji, Jesuuri na riuriataquiaari cuno juucaja Pueyaso Secojojua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

¹⁵ Naacuajitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori se-queeseeri:

—Jesui cunocuaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quiatunu panijia juucua.

¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiyajaacuhuj.

¹⁸ Naa Jesu sequesacari nojoritij, narta Judiocuaca camarucuaari jiyanohua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanohua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyanijijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujuanaa nia sequeyanijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niquiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitioj-quiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari

nocuaji shiriiquitiuniutianiya. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacujani. ²² Cua Queeri maja na nequesoreenu quiniutianiya pueya. Nojuacuajaari tari cua niqutiocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojtiajaca, naatej, taa cua Que na tojtiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

²⁴ 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaaniuhuj, nojuajaari pueyaracaanu Pueyasota rishiriqiano cutara. Nojuajaari maja na saniitiosaanu quiniutianiya. Nojuacuajaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutianiyari juhua macunucua quijiaca samiitiacosacari. Seetanujuanaa quiarijaari, juhua macunucua quijiacaari cua rupaa tojtianutaniya. Cua rupaa tojtiajacaari samiitiaconutaniya, pueyaracaanu rishijia nojori quiniuria. ²⁶ Cua Queeri quijiajuhuanajaj. Majaari na naata shaajenu. Nojuajaari naa quijara cua jiyatequiaarijuhuaj, juhua nojuarajuhuj. Naacuajitij, cua naata pueya jiyatenu naa quijarajuhuj. ²⁷ Pueyanora cua quiniucua, na cumaaca cua niqutioreeri cuarta pueya cua nequesoreenura, nojori cua saniitionurajuhuj. ²⁸ Cua tojtitiare. Majaari nio sequesanoocuaji nia shiriiquiniu. Tamacari, puetunu macunucujanaari cua rupaa tojtitiuniutianiya. ²⁹ Macunucua tojtitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante

sesa miijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijiajanaa na quiniuucua, Jesu tama nojuajiniji pohuataajaaja

³⁰ Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuaaja miyashijia cua quiniuucua, janiyari namitiajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijijaaja pohuataa narta pueyano, na pohuatasanoocua maja tiuushano. Naaratej, janiya jaara tama janiyajiniji pohuatariquia nia niquiarani, tama cua pohuatasanojuaaja maara najuhuana quiriquiaj. ³² Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishiyanjia na pohuatasano janiyajinijiiri maja najuhanaj.

³³ Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu quiqianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijijaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjini-jini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiquianu na

pohuatasano. ³⁶ Tiuquinijiona Juan pohuatasano janiyajiniiri seetanujuanaa. Niaa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miiniuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanoocua. ³⁹ Niaari suraatia serojoquiaa tariucuaaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiri, niaari naa pueyaraanu quijiara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninu paniyaquiquiaa cua jiyatenura nijaniya pueyaracaanu quijiacara cutara.

⁴¹ 'Maninia cua miishanoori maja pueya sequenura janiya: "Quiaari maninia pueyano". Janiyari saaja cua Que shuquiritiquiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia paniyaquishacari nojuaja. ⁴³ Cua Quecuajaari cua jiyaroquiaari cua niishitiojonura nijaniya nojuajiniji. Quiarijiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosadora na quiniuria, niaa maara cuno tojiri cutara, nojuaja jaara niaacua nimia na niishitiojonura nijaniya tama na niishishanojuaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jiyaniniu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijiaca nia quiniuucua. Niaari jiyaniya niaa Pueyaso muerasu, juhua Moisés tojijiaca

nia quishacari. ¿Niaateeri seetanujuanaa Moisés tojijica? ¡Maja! ⁴⁶ Nojuacuajaari janiyajiniji naajiotaquiaari. Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. ⁴⁷ Nocuaji, niaa jaara Moisés naajiotasanoocua tiuyaquiuaa, ¿ni-aatucua taa tiuuri quiarjia cua pohuatasanoocuaní?

6

Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarjihuua Tiberias caminia. ² Jiyanohua queraatia pueyari Jesu niquiquiaari tari, cusosuhua na naatanijiosacari. Naaratej, nojoriiri Jesu neteyotariquiaa caminia shuriuquico. ³ Canaa shiitiasacari caminia taquijiria, Jesuuri canaa tacatamaa tuhuananuucua. Tii cajitiasee canaari. ⁴ Jiyacaritij, quera Pascuara queranacusacariiri quiriquiaa. ⁵ Jesu niquishacari jiyanohua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. ⁷ Felipeeri na riucuaare:

—¡Paa jaara cumaneeca jiitiare doscientos juuca pa poonijiosanojiniji pan pa masetajarani, cuno maara najuhuana secaja quiri puetunu nojoririjajanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanujuhuaj. Jesu sequeeseeri:

⁹ —Jiyaniijianaa, caya samijia niya cinco pan jiitiaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰ Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitiujia. Naaratej, pueyari cajitiurii. Puetunu cuno pueya maanujinijiniojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaaraari. Na nuhuaj, canaa na serotaniriiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuhaaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

¹³ Canaari cuno cinco panjiniji pueya miaquesano raacua reratereeni. Canaa reratesacari, canaari doce canaasatu mishinijioreeni. ¹⁴ Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujjunia, nooj, tariucuacaanu sequesaaquiaari pocua niriquianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco

(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiriojosano pueyani, canaari rosetaarohua caminiajiniarani.

¹⁷ Canaari botejinia tacataseeni, cuniquiji Capernaum tiacajiniara canaa niuutianura caminia taquijiria. Tariucua

ninishiquiiri quiriquiaa. Majaari Jesu tiuquiniu quiriquiohua juhuanojuaja canaacua. ¹⁸ Tari canaa niuutiasacari, paratuuri jiyanohua piyarojoriquiaa. Caminiaari cunora jiyanohua cajiniuucuariquiaa. ¹⁹ Canaari tari caminia jiu-ujiajinia quiriquiaani, seis kilómetroruhua canaa ruparetasaquiji. ¡Canaari jiyacari casaa niquirii canaacua catecanoyanoni! ¡Mohuaca caco canujuriquiaari! ¡Canaari nocuaji shiriiquitiurii jiyanohuani! ²⁰ Jiyacaritij Jesuuri canaa sequereeni:

—¡Maja pueretunu! ¡Janiyacujajinjia!

²¹ Na rupaa canaa tojishacari, canaari shuquiriaatia na tacanitiurii botejiniani. Canashiyaquiji boteeri ritia shiitiasee terara canaa quiariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na pajenuunu coteequiaari tee canaa quiriquiaa caminia taquijiriacuajani. Nojoricuajaari tenacari niqiquiaari saaja niquiriyatu boteeri shiitariquiaa. Saaja canaa, Jesu saquiriojosano pueyani, canaari cuno botejinia quiaquiaariuhua nojori niquiarani. Majaari Jesu quianu quiriquiaa cutara canaata. ²³ Jiyacaritij, Tiberias tiacajiniji boteeri tiuquijioquiaari catecaja nojorijiniji, tee Jesu mianuutequiaari nojoricuajani. ²⁴ Cuno pojori niishishacari maja Jesu quiniu quiriquiaa tari tii, canaa na saquiriojosano pueyajuhuj, nojoriiri cuno boteyajinia tacataquiaari. Nojoriiri Capernaum tiacajinia nijioquiaari cuno boteyajinia, tii nojori pajenura Jesu.

Jesu Cristo juhua poojia miaquesano

²⁵ Cuno pojori tiuquijiosacari caminia taquijiria, Jesu riuriatatureeri. Na nequesotatureeri:

—Niishitiojonanaa, ¿taacari quia niyarohuacuaarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pajenu janiya nia niquniuucua cua cumaacata cua miishano. Niaari cua pajenuya saaja cua mianuutenuucua nia-janiya, taa nia tooquiorucuaacuajani, cua mianuutesacari niajaniya. ²⁷ Maja saaja miaquesanoocua nia tacaaniu, nia cuaqueya nia cumaquitajara. Cunoori maja na jiyatenu quiniutianiya niajaniya pueyaracaanu rishijara. Saaja nia tacaari cutara nioojia samiitianijia miaquesanoocua, pueyaracaanu rishijia nia quiniuria. Janiyacuajaari cuno nia niqutioriquianoni, pueyano cua quiniuucua. Cua Quecuajaari cunora cua jiyaroquiaari. Cunora, cua Queeri cua miitiquiaa cua miishano na cumaacata, nia niishiniuria janiyari na jiyarosani.

²⁸ Cuno pueyari Jesu nequesotaree:

—¿Casaa miiniutianiyani Pueyaso panishano canaa miiniuria, Pueyaso shuquiritiasano canaa quiniurijuhuaaj?

²⁹ Jesuuri nojori riucuaaree:

—Pueyaso Jiyarosanoocua nia tiuuri. Saaja naa nia miishacarij, Pueyasoori nia shuqiritianutaniya.

³⁰ Cuno pueyari Jesu sequeturee:

—Canaa niqiara quia cumaacata casaa quia mi-iricuarajaj, canaa niishiniuria quiaari seetanujuanaa Pueyaso Jiyarosano. ¿Casaa canaa quia niqutiniutianiya canaa tiuniuria quiocuani? ³¹ Canaa quia niqutir-icuaraja quia cumaacata quia miishano, taa Moisés niqutiquiaari canaa supuetanaacuaani. Nojuajaari jiyocuaaanuji pan tinquiaari pueyaracaanu nojoriria, cariiquia jiyajinia nojori rucuanesacari. Naa naajiotasano quiyacuajaari tariucuacaanu Pueyaso Rupaajinia:

“Nojuajaari nojori mianuutequiaari jiyocuaaanuji tinio pan”.

Naacuajitij, canaari niishiyani Moisésacuajaari Pueyaso jiyarosano quiquiaari.

³² Jesuuri nojori riucuaaree:

—Seetanujuanaa nia sequeyanijia, cuno jiyocuacaanuji panni, cunoori maja Moisés tinishano quiquiaari. Majaari seetanujuanaa jiyocuacaanuji pan na quiniu quiquiaar-ijiuhuj. Quiarijia cutara, cua Queeri niaacua jiyarorucuaa seetanujuanaa jiyocuacaanuji panjanaa cutara. ³³ Cuno, Pueyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeree:

—;Jiyaniijianaa, quiocua pueyaracaanu canaa niqutioriquia cuno pan!

³⁵ Jesuuri nojori sequeree:

—Janiyacujaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuurijiaaniuhuj, majaari na jiyamuenu quiniutianiyajuhuj. ³⁶ Taa cua sequeree tari niajaniyacuajani, niaari juucua cua niqiyia. Majaari quenaaja cucua nia tiuuniu. ³⁷ Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua rosenu quiquiaari cua miiniuria tama cua miiniu panishanojuaaja. Mijiria niqiaarinijia saaja cua Que panishano cua miiniuria, cante cua jiyaroquiaaricuajani. ³⁹ Majaari cua Jiyarona paniniu cua juurequetenura quenaaja niquiriyatujua na niqutiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapute cucua tiuujiacani, nojori niishishacari janiya Pueyaso Niyani, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarinii.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree. ⁴² Sequetureeri:

—¿Majate nio pueyano Jesucuaaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucuaja! ¡Maja nia juaaquionu! ⁴⁴ Pueyanoori maja na naata tiuuniu cucua tamajaaja, cua Que jaara noojiajinia poonijiyaquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuacaanu pueyara Pueyaso sequesano caminiujiunia naajiotasanocuajaari naa sequeya:

“Pueyasocuajaari puetunu nojorijianaa niishitiojonutaniya”.

Naacuajitij, cante cua Que niishitiojosano tojjia seetanujuanaani, nojuajaari cucua tiuya.

⁴⁶ 'Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricujani. ⁴⁷ Seetanujuanaa nia sequeyanijia, cante cucua tiuujiani, nojuajaari tari pueyaracaanu rishijara jatanishaaree. ⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miacquenuquiaari juucua. Naajaa, saaja cusonuuquiaariiri. ⁵⁰ Saniniuujia, cante quiarijia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuarajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa seque-tooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³ Jesuuri jiyacari nojori sequeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhujaj, majaari samiitianijosano nia quiniu quiniutianiya, pueyaracaanu quijiaca nia quiniuria.⁵⁴ Cante cua shu miaquereeni, cante cua nanaca ratureejaaniuhujaj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianiuhua jiya puequesacarini.⁵⁵ Cua shuuri seetanujuanaa miaquesano cutara. Naajuhujaj, cua nanacaari seetanujuanaa ratusano cutara. Cunoori maja juhua mijiria nia miaquesano.⁵⁶ Cante cua shu miaquenani, cante cua nanaca ratunajaniuhujaj, nojuajaari coojia rupueja. Janiyari noojia rupuejajuhujaj, pueyaracaanu rupuetootesano canaa quiniuria.⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiya-juhujaj, na rupuesacari janiya.⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuquiaari najuhuanaj. Naajaa, saaja cusonuuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niquiara Pueyaso secojojua tiajinia Capernaum tiacajinia.

Queraatia Jesu nuhuajiniaa pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamaajaaja:

—Cuno na sequesanoori jiyanohua jiyajeneta pa miiniuria puetunujuanaa. Maja pa naata. ¿Cantucua na tojirijaarajaanijia?

⁶¹ Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? ⁶² ¿Niaatucua taa sequere socuani, niaa jaara cua niquiri tacaano jiy-ocuaaanuhua, teje cua niquiaaricuajani? ⁶³ Cua shu maja cumaacaraca pueya na samiitianiniuria. Saaja cua So-huanu cutaraari pueya samiitianijia, pueyaracaanu rishijiaa nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaninya. ⁶⁴ Noojiaqueya niajanijajinijinioori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quiatenutaniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesotaree:

—¿Niajanियariuhuj, niaateeri cua cartenutaniyajaacuhuj?

⁶⁸ Simón Pedroori Jesu riucuaaree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasanocuajaari na naata canaa jataniniu pueyaracaanu rishijia canaa quiniuria. ⁶⁹ Canaacuajaari tari quiocua tiuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniuujia, niquiriyatu niajanijajinijinioori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajinijinio Jesu doce saquiriojosano pueyajinijinio quiqiaari. Naajaa, tama na Jiyaniijajaaja tacartariquiano quiriquiaaquiiri.

7

Tama Jesu tapueyocuacajaaja Jesuucua tiuyashijiaca quiqiaari

¹ Na nuhuaji, Jesuuri Galilea jiyajinia rucuanajoriquiaa. Canaari na cojiriquiaani. Majaari na quiniu paniniu quiriquiaa Judea jiyajinia, tii quiniaa Judiocuaca monu panishacari nojuaja. ² Jiyacaritij, quera socua canaa Judiocuaca queranacusacariiri quiqiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujinia nojori quishacari. Naa miitiquiaariiri puetunu marijarajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiqiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajaarijia naa Jesu sequeturee nojori macaatiniuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuaj. Quiocua tii miijiosee quia cumacata, quia jiyopue niquniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohuaja miijiore na cumacatani? Naatej, taa niya quia miijioquiaa quia cumacatacuaani, naa quia miijiosee puetunu pueya niquiarajanaa Jerusalén tiacajiniajuhuaj.

⁵ Majaari quenaaja tapueyocuaca tiuuniu quiijia Jesuucua. Cunora naa na sequetureeri. ⁶ Jesuuri saaja nojori riucaaree:

—Juhuanajuaja maja cua quiasacari cua miiniuria taa nia sequeyacuajani. Njaa jaara quianu paniri, niama juhuajaniya quiaaretej. ⁷ Niarta mijiria quijiaca pueyari maja na naata juaaniu nijaniya. Janiya cutaraari nojori niqiniu paniyaquishooni. Cua niqitiuniu paniyaquiquiaari, nojori cua niishitishacari nojori miishanoori sesa. ⁸ Nia quiojiyare queranacunuucua. Janiya cutaraari maja cua quianu quiniutianiya juhuanajuaja. Quiarijiani, puera juhuacarijaari cua miiniuria taa nia sequeree janiyacuajani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohuaja quiaaree nojori nuhuajijihuaj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojojua najuhuanaj!

¹³ Puetunu pueyajanaari naa sasacojotooriquiaa jiyasohuaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojua tiajinia. Tii coteeree pueya niishitijonuuri. ¹⁵ Canaa Judiocuaca camarucuaari jiuujiatequiaari nojori tojishacari Jesu niishitijosano. Naa sequetureeri:

—¡Cuno pueyanoori maja quenaaja na serojonu quiquiaari! ¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaaja. Cunoori cua Jiyarona niishitishano janiya. ¹⁷ Cante Pueyaso panishano miiniu paniyani, nojuaja cuara miiria taa cua niishitiojiyacuaani. Naacuajitij, nojuajaari jiyacari niishiniutianiya, cua niishitiojosanocuaajaari Pueyasojiniji seetanujuanaa, maja tama cua niishishanojuaaja. ¹⁸ Cante tama na niishiriojosanojuaaja pohuatajani, nojuajaari saaja naa miiquiaa juhua tojishano pueyano na quiniuria. Jiyano pueyano cuara tojiyaquishaaria. Saniniuujia, cante na jiyarona niishitiojosano pohuataa pueyani, pueya tojiniuria na jiyarona, cuno pueyano pohuatasano cutaraari seetanujuanaa. Cuno pueyanoori maja pueya sapojoua.

¹⁹ ¿Niaateeri seetanujuanaa supuetana Moisés Rootasano tojitiyajaca? Majaruhua. Majaari quenaaja niquiriyatu nijaniyajinijinio na rootasano tojijia. ¿Casaara nia monu paniya janiyani? ¿Supuetana Moiséste naa nia niishitiojiya na naajioneejinia?

²⁰ Nojoriiri Jesu riucaaturee na juaaniutia:

—¡Quiaaqui samaruraca! ¿Cante quia monu paniyani? ¡Canaa quia sequeretoj!

²¹ Jesuuri nojori sequeree:

—Puetunu nijaniyajanaari shiriiquitiuquianu samaatenu juuca cua miishacari niquiriyatu casaaniyojua cua cumaacata. ²² Supuetana Moiséscuaajaari nia rootaquiaari nia mueya cararaatiuuquia co nia miatenura, ocho juuca jaara na shocojore na rasaanujiniji. Seetanujuanaa, nio niishishanoori maja tama Moisés niishishanojuaaja. Cunoori tariucuacaanu pa supuetanaa niishishano Moisés niyacarijia. Pueyari

naa rootasaaquiaari naa nojori miiniuria necohua, seetanujuanaa Pueyaso saquiriojosano Israel pueya nojori quiniuriajuhuaj. Naaratej, jaara quiri samaatenu juuca, naajaa, niaari naa nia niquiohua cararaatiuuquia co miatejoquiaa. ²³ Naa nia miishacari samaatenu juucatej Moisés Rootasano nia tojiniuria, ¿casaara nia juaya janiyani, cua naataniniuucua cusosu samaatenu juucani? Niaari saaja shiitianiyojua miatejiya, maninia nia niquiohua quiniuria Pueyaso niquiara. Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuana pueya juaariiri na miishano jaara sesa quiyaquiri.

Jesu pohuatasacari tama nojuajinijijiaaja

²⁵ Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaja na mosocoriquianotej? ²⁶ ¿Taateni? Noocuajaruhua juhua-janiya pohuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariquianotej? ²⁷ Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniu-tianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojojua-jinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri ni-
ishiyajuhuaaj, tejenote janiyani? Naajaa, majaari cua
niniu quiquiaari tama cua panishacarijiaaja. Janiyari
jiyarosanoni. Cua Jiyaronaari seetanujuanaa quijiajuhua-
najaj. Nojuajaari nia niishishoo. ²⁹ Janiyari na niishiya

cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriqiaa na qianura. Majaari na naata quianu quishaaquiaari, juhuanajuaja na monu juuca quiyaquishacarijia. ³¹ Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuqiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuhuaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucuaara rojotooquiaari. Na nuhuaji, nojoriiri Pueyaso Secojoua tia cojuanaa pueya jiyaramiquiquiaari Pueyaso Secojoua tijiniara, tii nojori qianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianihuani.

³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaji, cuno Judiocuacaari tama sequetooreejaaja:

—¿Tee na qianutaniyajanojoni naa pocuaaniquitij, na riuriataaquishaanurajuhuj? ¿Parta Judiocuacaacua qianutaniya soj, noo pojoriicua Griegohua tajinia niaaquejoquiaritij? ¿Tii niishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pohuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niquiara. Jiyanohua na rupaa paaretareeri. Naa sequereeri:

—¡Cante jiyamueyani, nojuaja cuaara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequesacaritij, nojuajaari Pueyaso Sohuanujiniji pohuatariquiaa miriqui. Jiyacaritij, Pueyaso Sohuanuuri juhuanujuaja maja na quiniu quiriquiaa mijiria, Jesu tacaquishacarijia Jiyaniijijajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanuji.

Pueya juaatioosacari Jesuucua

⁴⁰ Jesu jaara pohuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeree:

—¡Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaaquiaari pocua niriquianotej!

⁴¹ Tamasacaari saniniuujia naa sequeriquiaacujua:

—¡Nojuacuajaari Cristo, Pueyaso Jiyarosano pocua! Tamasacaari saaja nojori riucuaaree:

—¿Cristoteeri Galilea jiyajiniji supuenutaniya? ¡Maja!

⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia David niquihuajiniji supuenutaniya. Belén tiacajinia rasaanutaniyari, supuetana David tiacajinia.

⁴³ Naacuaajitij, puetunu pueyajanaari Jesuucua juay-onuutaquiaari. ⁴⁴ Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiyuaquishacari Jesuucua

⁴⁵ Pueyaso Secojoua tia cojuanaa pueyari Jesu tojitiariquiaa juhuajaniya. Na nuhuaji, socua quiojijyarohuari na jiyaramiquiniaa pueyacu. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucua-ree:

—¡Majaari quenaaja tamonu pueyano pocuanu juhua cuno pueyanojua, seetanu rupaajanaa pohuataja cutara!

⁴⁷ Fariseocuacaari cunora nojori juarii:

—¿Niaateeri niaacua na shanacuree na sapojonura niajanijahuaj? ⁴⁸ ¿Tamonu pa camarucujinijiniote nocua tiuurii, canaa Fariseocuacajinijiniojuhuaj? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano niishiyashijiaca! ¡Nojoriiri sesoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moisés cuajaari pa rootaquiaari maja najuhuana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juarii saaja:

—¿Quiaateeri narta Galilea jiyajinijinio pueyanojuhuaj? ¡Jacaria quia pajere tariucuacaanu Pueyaso Rupaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueni quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojijyarohua.

8

Jesu jiyanooshacari maaji

¹ Jesuuri saniniuujia Olivo cuhuariquiajinia quiaaree.

² Jesuuri tariquicuaji tiuquiriohua Pueyaso Secojojua tiajinia. Canaari nata quiriquiaajuhuj. Pueyari nocua rerejoquiaari. Nojuajaari cajirii pueya na niishitiojonura juucua.

³ Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa Jesuucua. Cuno maajiiri riuriatasaaquiaari numuetucushiyano. Nojoriiri cuno maaji nujuateree pueya tacoji. ⁴ Jiyacari Jesu sequetureeri:

—Niishitiojonanaa, nio maajiiri quiasaaree numuetucushiyano. ⁵ Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanियarijataj, taa quia sequeyanijia?

⁶ Judiocuaca camarucuaari naa Jesu nequesotaree najuhuanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquirojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja joree, jiyajinia na naajionura na juaashiquiata. ⁷ Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijiniote sesa miyashijiani, nojuaja cuaara na coteetaara janu.

⁸ Jesuuri jororohuacuhua socua na naajionura jiyacua. ⁹ Cuno pojori tojishacari naa Jesu sequesantej, puetunujuanaari sanaa quiojorohua. Juhucatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuanaa. Saaja Jesuuri jatequee cuno maajitia.

¹⁰ Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate que-naaja tamonu cureenu quirii na jacunura quiajaniya saitia?

¹¹ Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janiyari quia jiyanoya cutarani. Juhuaaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹² Nojori nuhuaji, Jesuuri pueya niishitiojonu coteerohua. Nojori sequereeri:

—Janiyari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³ Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pohuataa! ¡Puetunu quia pohuatasanojuanaari maja tojishano!

¹⁴ Jesuuri nojori riucuaaree:

—Tama cua cuaqueyajinijiaaja cua pohuatasacari, cunoori maja najuhuana pohuatasano. Cua pohuatasanoori seetanujuanaa cutara. Janiyacuajaari nishiyani teje cua niquiaarini, tee cua quianutaniuhuani. Niaari saniniuujia niishiyaquiyacujua teje cua niquiaarini, tee cua quianutaniuhuani. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijijiuhuaj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa miijia cutarani, cua sequesano cutaraari seetanujuanaa, niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaaniuria sesa miijiaa.

¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pohuatasano jaara juhua tarajanu pohuatasano quirijiuhuaj, cuno cutaraari seetanujuanaa”.

¹⁸ Naajuhuj, canaari caapiquini. Tama cua cuaqueyajaaja cua pohuatasacari, cunoori seetanjuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijihuaj.

²⁰ Jesuuri puetunu nio pohuatariquiaajanaa Pueyasora niquitiojosano cumaneeca racataja shuriucuaaji, Pueyaso Secojoua tiajinia. Naajaa, majaari pueya quianu quiri-iquinioj, juhuanouaja na monu juuca quiyaquishacarijia.

Jesuucua tiuyashjiacaari jiyanoyaquishaanutaniya

²¹ Jesuuri cuno Fariseocuaca sequerohuacuhuj:

—Janiyari quianutaniyani. Niaari cua pajenuunutaniya juucua. Niaari cusonuunutaniya sesa miijiacaja, jiyanooshoo nia quishacarijia, cucua nia tiuyaquiniuucua. Naaratej, majaari nia naata quianu quiniutianiya tee cua quianutaniyacuaani.

²² Naa Jesu sequesacaritij, cuno narta Judiocuacaari tama sequetooreejaaja:

—¿Casaara na sequereecuararini: “Maja nia naata quianu quiniutianiya tee cua quianutaniyacuaani”? Tama na cuaqueyajaaja miaquenutaniya jiyoteeri.

²³ Jesuuri nojori sequeree:

—Niaari ninishiqui quiquiojinijinio. Janiya cutaraari jiyocuacaanujinijinioni. Niaari saaja mijiria quiijaca. Janiya cutaraari maja niiquijinioni. ²⁴ Janiyacuajaari cunora nia sequereeni, niaari jiyanooshoojua cusonu-unutaniya nia cuaracashitiniuucua janiyari maja Pueyaso Niyani, taa cua sequequiaa nijaniyacuaajani. Cunora niaari jiyanooshoo quiniutianiya, pueyaracaanu sanitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucuaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queraatia jiitiaajaa cua sequesocoriquiano niajaniyani. Naa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa niajaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”. ²⁸ Jesuuri cunora nojori sequeree:

—Naa jaara cua teetere, niaari shusha jiyacari niishiniutianiya, janiyari Pueyaso Niyani. Naa niishiniutianiyajuhua, majaari tama cua niishiriojosanojuaaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niqiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiuuniaa narta Judiocuaca sequeree:

—Naa jaara seetanujuanaa cua pohuatasano tojijia quiri pueyaracaanu, niaari cua pueya quiniutianiya. ³² Naa jaara naa miiritij, niaari seetanu rupaajanaa niishijia quiniutianiya. Naacuajitij, niaari seetanujuanaa juhua cartesano pueya quiniutianiya, juhuajaniya quijia nia quiniuria.

³³ Narta Judiocuacaari Jesu riucuaaree:

—Canaacujaruhua supuetana Abraham jihuacuajinio supueno pueyani. Majaari quenaaja canaa quiniu quijia

tamasaca poonijjotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijjotesano pueya quiya. Majaari na naata maninia miijia na quiniu. ³⁵ Poonijjotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaraaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuj, janiya jaara nia jaariuutiare nia poonijjotenjini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojinuu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijiac quiricuara, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiac taa nia que miiquiaacuaani.

Nojoriiri Jesu juaarii:

—¿Casa quia sequeyani? ¿Canaari maja saa maaji rasanojuani! ¡Pueyasocuajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua niniu quiquiaari. Cua Que Pueyasocuajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyacuiya. ⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojoujaari. Na sapojosacari, naa miyari sapojouja na quiniucua. Sapojonu niishiniuni, cunoori nojuajiniji supuequiaari. Niaari cuno nia que tojjiaca. Nocuaji niaari naa sapojonuujuacajuhuj. ⁴⁵ Saniniuujia, cua pohuatasacari seetanu rupaajanaa nijaniya, majaari cucua nia tiuuniu quiquiaa. ⁴⁶ ¿Casa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari nijaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Nijaniya saniniuujia, niaari na rupaa tojiyaquiya, na muerasu nia quiyaquishacari.

Jesucristoori tariucuacaanu quijiajuhanaja Abrahamjiniji

⁴⁸ Narta Judiocuacaari naa Jesu juaarii:

—¿Canaacuajaquiri maninia sequeriquiaa quiajaniya-jinijini, quiaari Samaria jiyajinijinio tahue, samaruraca pueyanotuhuj!

⁴⁹ Jesuuri nojori riucaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaaniu naa nia sesacasacari janiya. Tamonu cutaraari quiya, nojuajaari

paniya pueya tojiniuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

⁵² Narta Judiocuacaari na sequere:

—¡Quiarjia cutara canaari niishiyani quiaari seetanujuanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniuujia quiarjia sequeyacuaja: “Cante cua rupaa tojjiani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijihuaj. ¿Canteeri quiajaniani naa quia sequenuratej?

⁵⁴ Jesuuri nojori riucaare:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵ Niaari seetanujuanaa na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jyanohua timiquiaariiri.

⁵⁷ Narta Judiocuacaari Jesu juaarii. Naa na seque-
tureeri:

—¡Jaj! Majaruhua juhuanojuaja cincuenta marijia shocojonu quiajaniani. ¿Taa quia sequeyarini quiaa canaa supuetana Abraham niquiquiaari?

⁵⁸ Jesuuri nojori riucaare:

—Janiya nia sequeya seetanujuanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequesantej, narta Judiocuacaari sai pajenuuree Jesu na jacutajara juucua. Jesuuri nojoriicuaaji jamaarii saaja. Pueyaso Secojojuatiajiniji tohuatamaari.

9

Jesu jeeacasacari cariyujuaru namijia, naa rasanojuhuanajaj

¹ Tamacari Jesu rucuanijosacari canaata, canaari cariyujuaru pueyano niquiriini, naa rasanojuhuanajaj.

² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaanuacari cariyujuaruni, na queya miiniuucua sesatee, tama sesa na miiniuucuaajaaja soj?

³ Jesuuri canaa riucaaree:

—Maja. Maja cunora naa na rasaanu quiquiaari. Naa rasaanuacariiri Pueyaso cumaaca niishishaanura, na namijia jaara jeeacaare niqijiara na quiniuria. ⁴ Juuca quishacarijia, pa tucuatate miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riorocoree. Na riacauta coniquioreeri. Coriyacau mara rutorohua cariyujuaru namijiaacuaari. ⁷ Cariyujuaru sequerohuari:

—Siloé cuarimia quia jeequese quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariyujuaruuri cuarimia quiaaree. Tii na namijia jeequeseeri. Tariucua niqijiaraari na tiajinia tiuquiriohua. ⁸ Cariyujuaru na quishacarijia, nojuajaari

na miyajau na masetajara cumaneeca mashiniquijiojua quiquiaari. Puetunu pueyajanaari na niqutiujia naa na mashiniquijiosacari. Naacuajitij, nojuaja jaara niqijiara quiquiaari, tarijia na niqiniaa pueyari, mariyata na shuriucua quiniaa pueyano, nojoriiri tama seque-tooquiaarijiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuatej?

⁹ Noojiaqueya pueyari sequeree:

—¡Taaquiririnij, nojuajacuaj!

Tamasacaari saniniuujia sequereecujua:

—Nojuajaquinio naasucua. Juhua nojuaja niqishiyacuaj, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiririnij, janiyacuaaquiniatejaj.

¹⁰ Naaratej, pueyari na nequesotaree:

—¡Quiaacuaja cariyojuaru quijiaruhua! ¿Taa niqijiara quia quiriohuarini?

¹¹ Nojuajaari pueya riuquaree:

—Cuno, Jesu jyanishano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, jjaniyari niqijiara quiquiini!

¹² Pueyari na nequesotaree:

—¿Teeteeri quia namijia jeecana pueyanoni?

Nojori riuquareeri:

—Johuj. Maja cua niishiniu.

Fariseocuaca nequesoreesacari na namijia jeecano pueyano

¹³ Pueyari Fariseocuacaacua jiyataaree Jesu jeecano cariyojuaru pueyano. ¹⁴ Jesu jaara mara coniquioquiaari na jeecanura cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaji

Fariseocuacaari tarijia cariyujuaru quijia nequesotaree taa niquijjara na quiriini. Nojuajaari nojori riucuaaree:

—Jesu cua namijjaacua rupojorucuaa marani. Na nuhuaji, janiyari cua namijia jeequeseeni. Naacujitij, janiyari quiarjia niquijia quiyani.

¹⁶ Noojiaqueya cuno Fariseocuacajinijinioori saa sequereejaa:

—Cuno pueyano, nio pueyano namijia jecarucuaani, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacujua:

—Jaara sesa mijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucuatej, nojoriiri juhua raqitiirii. ¹⁷ Nocuaji tarijia quijia cariyujuaru nequesotaturohuariuhuj:

—Niquijia quia quishacari quiarjia, ¿taa quia sequeya Jesuni? ¿Maninia mijiatee?

Nojuajaari saaja Fariseocuaca riucuaaree:

—Janiyara, nojuajaari Pueyaso sequesano caminiuujia.

¹⁸ Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariyujuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariyujuaru rasanujuhuanani? ¿Taa quiarjia niquijjara na quiriohuarini?

²⁰ Na queyari cuno pojori riucuaaree:

—Taaquiriirinij, nojuacuaaquinateja canaa niyanujuaj. Naa cariyujuaru rasaaquiaariiri. ²¹ Majaari canaa niishiniuujihuj, cante na namijia jecarucuaani.

Nojuaja nia nequesotare, tari cumantumacacuaja. Nojuajanaa cuara nia pohuataara cutara.

²² Na queyari naa riucuaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, naa sequejaca pueya cuara tenujusaaria maja Pueyaso secojowa tiajinia na tiuquiniuria socua”. ²³ Naaratej, na queyari naa narta Judiocuaca riucuaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeeacasano pueyano. Nojoriicua na nishacari, na seque-tureeri:

—¡Paacuaajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jeeacasano pueyanoori nojori riucuaaree:

—Naajaa, jaara sesa miijia quiri, jaara maninia miijia quirijiuhuaj, maja cua niishiniu cuno. Janiya cutaraari niishiyani, ¡janiyari tarijia niquiyashijia quiquiaarini! ¡Janiyari saniniuuja quiarjia niquijia quiya cutarani!

²⁶ Nojoriiri na nequesotarohuacuhuj:

—¿Taa na miiriucuaa quiajaniyajaarani, niquijia quia quiniuriani?

²⁷ Narta Judiocuaca camarucua sequeree saajaari:

—Janiyacuaaja tari nia pohuataareni. Majaari nia tojinu paniniu janiya. ¿Casaara nia paniya socua cua pacutenura sequenu niajaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na seque-tureeri:

—¡Quiaari cuno pueyano tojjiacuaja! ¡Canaa cutaraari supuetana Moisés Rootasano tojitiajacani! ²⁹ ¡Canaa

cutaraari niishiyani Pueyasojuanaari Moiséscua muestaquiaari na rootanura nojuaja! ¡Saniniuujia cuno pueyanoorijiataj, majaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucuaaree:

—¡Niaaquiiri mosanucua seetanujuanaa! ¿Majateerinia niishiniu teje na supuequiaarini? ¡Nojuajaari cua namijia jeecarucuaa! ³¹ ¡Paacuaajaari niishiyani Pueyaso maja na tojiniu quijia sesa miijiaca secojosano! ¡Saaja na timitiajaca secojosano tojiya cutaraari, cante na panishano miiquiaacuajani! ³² ¡Majaari quenaaja pa tojiniu quijia tamonu pueyanojiniji, cante cariyujuaru namijia jeecajani, naa cariyujuaru rasanjuhuanaj! ³³ Cuno pueyano jaara Pueyaso Jiyarosano quiyaquiri, ¿taa cua namijia na jeecarucuaacuaraarini?

³⁴ Cuno pojoriiri na juaaniutia na sequeturee:

—¡Quiaari sesa miijia rasaaquiaari! ¿Quiaateeri jiyanojuaa canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojojua tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

Jesu tojtiaashijiaca pueya juhua cariyujuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequeree:

—Quiaacuaja na niquiyaruhua. Nojuajaari cunocuaja, quiata pocoofiyani.

³⁸ Jiyacaritij, pueyanoori Jesu cariquimiaji mojuquetaaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacujatij, cante niishiyani nojuaja juhua cariyujuaru quiya, nojuajaari juhua namijiaraca quiniutianiya cucua na tiuushacari. Saniniuuja, cante jiyaniyani nojuaja niquijia cutara, nojuajaari juhua cariyujuarura tari jiyatesaaree, cucua na tiuyaquiniuucua.

⁴⁰ Tii quiniaa Fariseocuaca jaara tojiquiaari naa Jesu sequesanotej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariyujuarujurijihua?

⁴¹ Jesuuri nojori riucuaaree:

—Niaa jaara tama nia cuaqueyajaaja jiyatere juhua cariyujuarura cucua nia tiuuniuria, Pueyaso maara nia jiyanoori. Quiarijiani, tama nia sequenuucuaajaaja, “Canaa niquijia cutarani”, niaari jiyanooshoojua nioojia nia taca-toyaquiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyaquijiani, nojuaja jaara tamocoji tiuquimia, cunoori nohuasejojua. ² Saniniuuja, cante tohuateyaco tiuquijia cutarani, cunoori borregohua camarujuanaa cutara. ³ Tohuateya cojuanaari tiootiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainiji. ⁴ Puetunu na borregohujanaa jaara tohuareetama, na camaruuri na puetaja. Na seyari

na nuhuaji sacuaja, na camaru rupaa nojori niishishacari.
⁵ Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pahuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

Jesucristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohu-ateyani, cua borregohua tiuquitianura cua Que Pueya-soocua. ⁸ Cante cua niyacarijia nijioquiaari coteenuni, nojoriiri sesa miijiaca quiquiaari, nohuasenuujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuani, nojuajaari Pueyaso pueyanora jiyate-saanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijini-acuma.

¹⁰ 'Nohuasejojuuari saaja tiuquijia borregohuacua na nohuasenura, na puecoonurajuhuj. Naa na shaa-jaaja puetunujuanaari. Janiyari saniniuujia niquiaarini cua borregohua cua jiyatenura pueyaracaanu quijiacara, seetanujuanaa jiyanoohua shuquiriaatia quijiaca nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuuari. ¹² Saniniuujia, borregohua camarujanaa jaara tamonu cojuateya na seya, cuno pueyano jaara niquiri sare nocua canujiyano, nojuajaari na puerenuta neteja. Borregohua

tiujiaqueeri. Naa miijiaari cuno borregohua quiyaquini-uucua na seyajanaa. Naacujitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujuanaa cuno borregohuacua. Nojuajaari saaja paniya na poonijiosano sami na niqitiosaanura.

¹⁴ Janiya cutaraari maninia cojuaja borregohuani, na camarujuanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuaaj, taa cua Que niishiya janiyacuaani, mariyata taa cua niishiya cua Quejaniuhuaaj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujini-jinio. Janiyari nojori rijionutaniya niyarajuhuaaj. Nojoriiri cua tojitiariquiano. Naacujitij, puetunu cua borregohuajanaari jatiqui quiriquiano, niquiriyatu cojuanaracajuhuaaj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacarijaaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoricuara cua cusonura. Janiyari cumaacaracajuhuaaj cua samiitianuhuara. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijaaaja Jesuucua. ²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhuana pocuaano!

²¹ Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jeecanu cariyojuaru namiji-ajaara? ¡Maja na naata!

Judiocuaca camarucua niquiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojojua tia jiyatequiaariuhua seetanujuanaa juhua Pueyaso quiquiora na quiniuhuara. Jiyacariiri shuniya quiriquiaa. ²³ Jesuuri tii quiriquiaajuhuj. Pueyaso Secojojua tiajinia quiriquiaari. Nojuajaari pueya jiyaniquishano tariucuacaanu jiyaniiija Salomón canujuucojojuajinia riujuuniuquiojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quiajaniyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaaree:

—Janiyacuaja tari nia sequecanuni. Niaari saaja na cuarachashitiquianu. Niaa cuaara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiuyaquiquiaa cua borregohua maanujinijinio nia quiyaquishacari. ²⁷ Cua borregohuari cua rupaa tojjia cutara. Janiyari nojori niishiyajaani-uhuj. Nojoriiri cunora cua nuhuajiquiaa. ²⁸ Janiyari pueyaracaanu quiijara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajiniji. ²⁹ Cua Queeri cua borregohua cua niqutioquiaari. Nojuajaari socua jiyanohua cumaacaraca tamasaca cumaacaraca quijiacajiniji. Naacujitij, maja quenaaja tamonu naata cua

borregohua jaariutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuuari sai rijioro-huacuhuj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanoohua sesa! ¡Quiaacuajaari pueyano, juhua canaajuhuj!

³⁴ Jesuuri nojori sequeree:

—Niaacuajaari tariucuaaanu naajiosano Pueyaso Rupa jiiitaa. Pueyaso sequesanoori naa naajiotasano quiya tii:

“Janiyacuajaari nia sequequiaarini, niaari pueyasohua”.

³⁵ Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaracua-jani. ³⁶ Naajuhuj, Pueyasocuajaari cua saquiriojoquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaaree sesani, cua sequesacari janiya Pueyaso Niyanuni? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiyaquiniuucua. ³⁸ Niaacuajaari cua Que cumaacata cua miishano niquiquiaa. Naa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Naa jaara niishiri puetunu cua miishanojuanaari cua Que

Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuaj.

³⁹ Jiyacaritij, nojoriiri socua Jesu quiatunu paniriohuacuhuaj. Jesuuri saaja nojoriicuaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaariijaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

⁴² Naacuajitij, queraatia pueyari Jesuucua tiuquiaari tii, tee canaa quiriquiaacuajani.

11

Lázaro shaajenujiniji pahuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj. ² Lázaro rimiatu Maríani, nojuajaari noo maajicuaja Jesu niohuaca sacuanijiaquiaari na mucacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuchiaari Jesu numootenuucua. Naaratej, cuno pueyano tiuquishacari Jesuucua, nojuajaari na caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jitiisanojinijini, pueyari Pueyaso cumaacata miishano niqiniutianiya.

Pueyari cunora Pueyaso Niyanu maniniuhuaqueetanu-taniya, cua Que Pueyasojuhuaj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaaquiaari Lázarojiniji, majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani. ⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacujaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

⁹ Jesuuri canaa riuquaree miriqui:

—Janiyara, juuca juhuanojuaja. Juucaari maninia seetanujuanaa pa rucuanefonura. Paa jaara pananu tiuquiyaquishacarijia rucuanefoneni, paari maninia niquiya pocuajini. Majaari pa tiuriiniu. ¹⁰ Paa jaara ninishiqui rucuanefonore saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanefonura, na mosaanu juuca quiyaquishacarijia.

¹¹ Na nuhuaji, Jesuuri naa canaa sequereee socua:

—Pa rupuena Lázaroori tari maquequee. Janiyari na niucujanuucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniniacua-jaaqui. Naacuajiti paari niishiyani naatanutaniuhacuajaaqui. ¿Paatucua casaara najuhuana nocua quiaareni?

¹³ Naa Jesu pohuatasacari canaa Lázarojinijitij, canaa sequeriquiaa juucuaari Lázaro tari macu quiriquiaa. Canaari saniniuuja jiyaniriquiaani Jesu naasucuaari

canaa pohuatariquiaa Lázaro nareja maqueriquiaa.
¹⁴ Nocuaji Jesuuri maatia canaa sequeree:

—Lázaro tari cusoyarucuaa. ¹⁵ Janiyari timiyani tii
 cua quiyaquiniucua Lázaro quishacarijia saminio. Naa
 quiarijia macu na quishacaritij, niaari socua jiyajeneta
 casaa cua miishano niqiniutianiya, seetanjuanaa cucua
 nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquirojosano pueya
 sequeree:

—Pa Jiyaniijata pa quiaarejuhuaj, nata pa cojiritiasaa-
 nura puecoonu.

Cuno Tomásri pueya sesojosano quiquiaari “Caapueya
 muetusano”.

Jesu, macunucua samiitianijiojua

¹⁷ Canaa jaara tiuquijioseequiaarini, Jesuuri pohu-
 atasaaquiaari Lázaro tari cuatro juuca shocotejoriquiaa
 raaco na niasaanujiniji. ¹⁸ Betania tiacaari catecaja
 Jerusalén tiacajiniji. (Nareja media hora paa jaara ritia ru-
 cuaneyareni). ¹⁹ Naaratej, queraatia narta Judiocuacaari
 quiojoquiaari Marta, María tijinia, nojori na cumanijia-
 nura na nanu nuhuaji. ²⁰ Marta jaara niishiquiaari Jesu
 shusha tiuquiriquiaa, nojuajaari nocua tohuataquiaari
 canaa na naacunura. Majaari María niniu quiriquiaa cu-
 tara. Tijiniaja quiriiri. ²¹ Canaacua Marta tiuquishacari,
 nojuajaari Jesu sequesee:

—Jiyaniijiana, ¡quiaa jaara niya quiquianu, cua nanu
 maara shaajeyaquiquianu! ²² Naajaa, janiyari niishiyani
 quiaa jaara Pueyaso secojore, Pueyasoorti quia secojosano
 tojiniutianiya.

²³ Jesuuri Marta sequeree:

—Quia nanucuaaja samiitianutaniuhua.

²⁴ Martaari na riucuaree:

—Taaquiriirini, janiyacuaaja niishiyani nojuajaari samiitianutaniuhua macunucua samiitiacosacariuhua jiya puequesacari.

²⁵ Jesuuri na sequere:

—Janiyacuaajaari macunucua samiitianijiojuani. Cante cucua tiuujiani, jaara cusoyare, naajaa, samiitianutaniuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaa-jenu quiniutianiya setanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucaare:

—Jaa, Jiyaniijianaa. Janiyacuaja niishiyani quiaari Cristo, Pueyaso Niyanu, noj tariucuaaanu sequesaaquiaari mijiria niriqianotej.

²⁸ Naa Marta riucaanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesantej, ritia sanequeeri. Jesuucua nimiaari tee canaa quiriqiaacua-jani. ³⁰ Jesuuri juhuanujuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canaacuajani, Jesuucua na nishacari. ³¹ Nojori cumanijianaa pueya jaara María niquiquiaari ritia tohuataano tiajiniji, nojoriiri na jiyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojoquetaseeri. Naa na sequereeri:

—Quiaa jaara niya quiquianu, cua nanu maara shaa-jeyaquiquianu.

³³ Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree.

³⁴ Jesuuri pueya nequesotaree:

—¿Tee na niasaarucuaani?

Pueyari Jesu sequere:

—Miji, Jiyaniijanaa. Quia niquiquii. Niya niasaarucuaano.

³⁵ Jesuuri nujuquese. ³⁶ Tii quiniaa Judiocuaca niquishacari Jesu nujuqueyano, tama sequetooreejaarijia:

—¡Nia niquiri! Jiyanohua Lázaro panijiaquiiri.

³⁷ Noojiaqueya cuno pojorijinijinioori sequeriquiaa-juhuaj:

—Jesu jaara cariyujuaru namijia jeecacanucuaa, maara Lázaro naataniquianujuhuaj maja na shaajenura.

Jesu samiitianishacari Lázaro

³⁸ Jesuuri jiyanohua na taraajenuta raa jiyajiria catecanoquiaari, canaajuhuj. Raari puereetuuca saajiata mishiquiosano quiriquiaa. ³⁹ Jesuuri pueya sequere:

—¡Saajia nia ruutiniri tamocora!

Martaari Jesu sequere:

—¡Jiyaniijanaa, cuatro juuca tari na shoconujiya! ¡Tari mocuaatia jaaniuya naasucua!

⁴⁰ Jesuuri Marta sequere:

—Janiyacuja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacuja. ⁴² Janiyari niishiyani quiaari pueyaracaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyarokuvaari.

⁴³ Naa Jesu sequenu nuhuajitij, jiyanohua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaca, na niohuacaari jiuniocosano quiriquiaajaa. Na nacaari puetunu na jiquiocotajanaa mishiquiosano

quiriquiaajuhuj, toquerauta morosano. Jesuuri pueya sequeree:

—Nia saacatare, cuaara rucaneera.

Judiocuaca camarucua roojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judiocuacaari nocua tiuquuaari, noo pojori canapue te Maríacua nijioquiaari na cumanijianuracuajani.

⁴⁶ Noojiaqueya cuno Judiocuacajinijinioori Fariseocua-caacua quiojoquiaari nojori pohuatanura Jesu miishano.

⁴⁷ Naaratej, Fariseocuaca, pueyacuara secojonaa jiyani-ijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiyani? Cuno pueyanoori queraatia casaa miiquiaa na cumaacata pueya niquiara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiu-ushacari! Nojoriiri na jiyaniijiaara socua na jiyatenutaniya. Naaratej, pa jiitianaa Romano pueyari pocua nijionutaniya Pueyaso Secojojua tia nojori niyartanura, pa pueya na puecoonurajuhuj.

⁴⁹ Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijiara. Jiyacaritij, nojuajaari narta camarucua sequeree:

—¡Niaaquiiri niishiyashijiaca seetanujuanaa!

⁵⁰ ¿Majateeri nia niishiniu? Maninia cutaraari niquiriyatu pueyano cusonura pa niti, maja najuhwana puetunu pa pueyajanaa puecoosanura.

⁵¹ Caifás sequesanoori maja tama na sequesanojuaaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani.

⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano

quiquiaari puetunu tariucua Pueyaso saquiriojosano pueyapueecuarajanaajuhuaaj, tee tiquiyocua niyaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqúi na quituniuria juhua niquiriyatu maanu. ⁵³ Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucuanefonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shurucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijijiaaja. Nojoriiri quiojiquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricuajani. Nojoriiri naa miiquiaari juhuajaniya nojori queranacunura Pueyaso niquiara Pascua juuca. ⁵⁶ Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiyatenojotij, maja soj?

⁵⁷ Pueyacuara secojonaa jiyaniijianucua, Fariseocuanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuara nojori numooteera nojori quiatenura Jesu.

12

María totasacari na shanohua jaanutaja Jesuucua

(Mt 26.6-13; Mr 14.3-9)

¹ Seis juuca jaara cureeriquiaaja Pascua juucara, canaari jiyacari Jesuta Betania tiacajinia quiaareeni,

Lázaro quijia tiacajinia, teyano Jesu samiitiani quiaar-
 icuajani. ² Cuno tiacajini jinio Jesu rupuenaa pueya
 timitiasacari Jesu, nojoriiri sumatunu quiaari nojori mi-
 aquenuunura cuno niucua Jesuta. Martaari miaque-
 sano patootari quiaa pueyara. Lázaroori Jesuta mi-
 aquenuuriquiaa narta masuusano pueyata, canaatanio.
³ Jiyacaritij, Maríari Jesuucara pataree na shanohua
 jaanutaja. Cunoori “nardo” jiyanishano nataujiniji
 shipinishano quiquiaari. Jiyanohua queraatia cumane-
 necata masesano. Puereetuuca moti quio cajiniocua
 puecari quiaari cuno shanohua jaanutaja. Maríari Jesu
 niohuacaacua na totaree. Na nuhuaji, na sacuanijiarohua
 na muecacataari. Puetunu tiacojuanaari shanohua jaa-
 nuriquiaa. ⁴ Naa María miishacaritij, niquiriyatu cana-
 ajini jinio Jesu saquiriojosano pueyanoori juaarii. Nojua-
 jaari Judas Iscariote quiri quiaa, na nuhuaji Jesu quiate-
 quiaari na paraani. Nojuajaari naa sequeree:

⁵ —¿Casaara cuno shanohua jaanutaja niqitioy-
 aquishaaree queraatia cumaneecarani, casamiijiuniucua
 pueya niqitiojosocoriquianoni? ¡Jaara masenu
 panishaare, maara niqitiosaare juhua niquiriyatu
 marijiara pueyano poonijionu sami!

⁶ Naa Judas sequesacaritij, majaari seetanujuanaa na
 taraajenu quiri quiaa casamiijiuniucua pueyacu. Naa
 sequereeri saaja cumaneecaacua jiaatiaja na quiniucua,
 nohuasejojua na quishacari. Judasri cumaneeca quiquio
 cojuatana quijia puetunu canaarajanaa. Naacujitij,
 nojuajaari tiji nohuasejojua, pueya niqitiojosanojiniji
 canaara. ⁷ Jesuuri saaja Judas sequeree:

—Nareja quia niquiri. Nojuajaari nio shanohua jaanu-
 taja cojuataja pueyaracaanu, juhuacarijia na jeenucuata-
 jara cua cuaqueya, pueya niaaquishacarijia janiya raa-
 jinia, janiya jaara mosaareni. ⁸ Casamiijiuniucua pueyari
 pueyaracaanu niaata quiri quiano cutara. Saniniuujia,
 janiyari maja pueyaracaanu niaata quiri quianoni.

Pueyacuara secojonaa jiyaniijianucua roojotoosacari Lázaroocuara

⁹ Queraatia canaa Judiocuacaari niishiquiaari Jesu Betsania tiacajinia quiriquiaa. Cunora, nojoriiri nocua quiojoquiaari na niquiniuucua, Lázaro niquiniuucujuhuj, teyano Jesu samiitiani quiaaricujani. ¹⁰⁻¹¹ Jesu samiitianiucua Lázaro, queraatia canaa Judiocuacaari Jesuucua tiuququiaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooquiaari Lázaro na motunurajuhuj.

Juhua Jiyaniijajanaa Jesu tiuquishacari Jerusalén tiacajinia

(Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiquiaari Jesu tariqui tiuquiniutianiyajuhuj.

¹³ Nocujaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuuriquiaari. Naa nacoori quiaajaariuhua nojori shuquiritasacari Jesu:

—¡Pocujaji Tacuna! ¡Pocujaji Tacuna! ¡Cuaara shuquiriatia quiiria pa Jiyaniijia, teyano Pueyaso jiyaroquiaari pocuacujani! ¡Nojuacuajaari Israel pueya Jiyaniijajanaa!

¹⁴ Jesuquiiri jiyacari burro niquiojua riuriatamaa. Tari na nijinia cajiriquiaari, taa tariucuaaanu Pueyaso Rupaajinia naajiotasano quiyacujani. ¹⁵ Naa sequeyari:

“¡Sión tuhananuucua quiniaa pueyanaa, maja puerenu!
 ¡Nia niquiri! ¡Nia Jiyaniijia cumaji niya niaacua!
 ¡Burro niquiojua nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuaaanu Pueyaso Rupaajinia naajiotasano tohuateeriquiaani. Pueyaso jaara Jesu samiitiani quiaariuhua, canaari jiyacari shusha niishiquiaarini cuno naajiotasano quiiri Jesujiniji quiquiaari.

¹⁷ Cuno pueya, Jesu samiitianishacari Lázaro niquiquiaarini, nojoriiri pueya pohuatariquiaa taa Jesu jiiquiooquiaari Lázaro na raacoji na tohuatanurani.

¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree.

¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa more-janaa! ¿Niaate na niquiya? ¡Puetunu pueyajanaari cuno pueyanooqua pacuree, na pueya nojori quiniuria!

Grecia jiyajinijinio taucuaca pocoojonu panishacari Jesuta

²⁰ Grecia jiyajinijinio taucuacaari Jerusalén tiacajiniara nijioquiaarijihuaaj Pueyaso niquiara nojori querana-cunuunura Pascuara.

²¹ Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequesee cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuaaj. ²³ Jesuuri naa nojori riucuaaree:

—Quiarijiani, tama janiyajaarijia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niquijiajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuaaj, cante tama na cuaqueyajaaja panijia puerani, nojuajaari puetunu shaajenutaniyanaa. Saniniuujia, cante tama na cuaqueyajaaja panitiaja na tojiniuria janiya mijiriani, nojuajaari pueyaracaanu shuquiriaatia rishijiaara jiyatesaanutaniya. ²⁶ Cante quiria poonijionu paniyani, cuaara seetanujuanaa cua fojjia quiiria. Tee cua quiniutianiyacuaani, cua tojitiajacaari

tii quiniutianiyajuhuaaj. Cua Queeri cua tojijiaca timi-tianutaniya. ¡Jiyanohua maninia nojori miiniutianiya-jaariuhuaaj!

Jesu pohuatasacari nojuaja mosaanutaniya

²⁷ 'Quiarijiani, janiyari jiyanohua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaari mijiriani. ²⁸ ¡Cua Quenaa, janiya cuaara miishiiriaqui taa quia paniy-acuajani, pueya niishiniuria quiaari jiyanohua maninia!

Jiyacaritij, Pueyasoori tojishaaree pocuaano jiyocua-caanuji. Naa Neyanu sequereeri:

—Janiyacuajaari naa niishitirii pueyani, pueyaracaanu quia miishacari cua panishano. Janiyari socua pacutenu-taniuha pueya niishitiniuni, quiaa jaara nojoriicuaa mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareeni!

Tamasacaari saniniuujia sequereecujua:

—¡Pueyaso serucuaja nocua pocuareeno!

³⁰ Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja. ³¹ Quiarijiani, mijiria quiniaa miishacari naquiya janiya, nojoriiri saniniuujia saniitiosocoriquiano jiyate-saaree tari. Naajuhuaaj, mijiria jiyaniijia Sesaacaari jataaanutaniyajuhuaaj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretanaura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riucua-ree:

—Canaacuaajaari tariucuacaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajanियarijataj, ¿casaara quia sequeyarinijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniutianiyajaara rupaquijiani. Nocua nia tiuuri juhuacarijia, ninishiqui quiyaquishacarijia. Cante ninishiqui ru-cuanejojuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuahuari. Nojoriicuaaji jamaashiiri.

Judiocuaca tiuyaquishacari Jesuucua

³⁷ Jesuuri jiyanoehua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸ Naacuajitij, tariucuacaanu Pueyaso sequenu panishano caminiujiunia Isaiás pohuatasanoori tohuateequiaari, nojuaja jaara naa sequequiaari:

“Jiyaniijianaa, ¿cante canaa pohuatasanoocua tiuuriini, canaa pohuatasacari quia Jiyarosocoriquianojinijini? ¡Shaaqui! ¿Cante niishiriijaaniuhuj, jiyajeneta casaa nojori niquishanoori seetanujuanaa quia cumaacata miishano quiriqiaa? ¡Shaaqui!”

³⁹ Naacuajitij, majaari nojori naata tiuuniu quiquiaari Jesuucua. Isaiásri naa naajiotaquiaarijuhuaj:

⁴⁰ “Pueyasoori nojori jiyateree juhua nimishitiuria, maja nojori niquiniuria na namijiata. Nojori niishiti-aja cushitioreejaariuhuaaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijihuaaj”.

⁴¹ Supuetana Isaíasri naa caminiuuiuquiaari Pueyaso niishitishano nojuajatej, Jesu na niquiniuucua na shacantuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiu-uquiaari. Queraatia canaa jiyaniijianucuaari nocua tiu-uquiaarijihuaaj. Cuno jiyaniijianucuaari maja na pohuatanu quijia pueya niqiara, Jesuucua tiuujiaa nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

Pueya tojtiaaquiniuucua Jesu sequesano, nojoriiri saniitiosariquiano

⁴⁴ Jesuuri jiyanojua na rupaa paaretaree. Naa sequereeri:

—¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhuaaj, cante cua jiyaroquiaaricujani! ⁴⁵ ¡Cante cua niquiriini, nojuajaari cua Jiyarona niquiriijihuaaj! ⁴⁶ Janiyari mijiria niqiaarini cua cuhuatanura nijaniya. Naacuajitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriqia najuhuanaj, janiyajanaari maja nocuara cua saquíriojotanu quiniutianiya na saniitiosaanura. Majaari cua niniu quiquiaari mijiria, pueya cua saniitionura. Janiya cutaraari niqiaarini nojoriicujia cua tacunura. ⁴⁸ Cante cua ruuretaja saajani, cua sequesano

tojiyaquiyajaariuhuj, nojuajaari tari nocuara saquiriojotana jiitiaa na saniitiosaanura. Nojoriria cua sequesano cutaraari tama nojoriicuara saquiriojotariquianojuaja nio jiya puequesacari. ⁴⁹ Cua pohuatasanoori maja tama cua niishishanojuaja. Cua Jiyarona cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucuaja, Jesuuri canaa na saquiriojosano pueyata miaqueriquiaa. Sesacaari tari Judas Iscariote niishitirii noojiajinia, nojuaja cuara Jesu quiateera na paraa, na mosaanura. Cuno Judasri tamonu Simón jiyaniishano pueyano niyanu quiquiaari. ³ Jesuuri niishijia nojuaja seetanujuanaa Pueyasojiniji niquiaari. Naajuhuj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴ Jiyaniijiajanaa na quishacari, naajaa, nojuajaari miaquejajiniji sanequiaari. Na tucuaque toque joculari. Na nuhuaji na cajiniocua camarucuteree cuaqueya tuujutajari. ⁵ Na nuhuaji, mohuaca shuurii tohuatashijiniaari. Caaa niohuaca jeequejoriquiaari juhua

tiaco seru. Na nuhuaji, na sacuanijiariquiaajaariuhuj na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

⁷ Jesuuri Pedro riucuaaree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸ Pedroori Jesu sequeree:

—¡Cua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuaaree:

—Janiya jaara quia niohuaca jeequejiyaquirini, majaari cua pueyano quia quiniu quiniutianiya.

⁹ Simón Pedroori na sequeree:

—¡Jaara naa quiritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu nijaniyajanaari tari jeequejosano quiyacuaja. Saa niquiriyatujuaari jeequesoo quiya sanini-uujia.

¹¹ Jesuuri tari niishiquiaari cante na quiatenutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesotareeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajanjia, taa nia jiyaniquiquiaa janiyacujani. ¹⁴ Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miiriquia niarta Pueyaso muerasujuhuj. ¹⁵ Janiyari naa miiriini, cua niishitiojonura nijaniya, naa nia miitioonurajuhuj taa cua miirii nijaniyacuaani. ¹⁶ Seetanujuanaa nia sequeyanijia, seruuri maja socua tojishano quijia na camar-nujiniji. Naajuhuj, jiyarosano pueyanoori maja socua tojishano quijia na jiyaronajiniji. ¹⁷ Naa jaara cua rootasano niishiri, niaari shuquiriaatia quijiaca quiniutianiya niaa jaara na tojijiaca quiri.

¹⁸ 'Shusha cua sequesano nijaniyani, cunoori maja puetunu nijaniyaranajuanaa. Janiyacuajaari niishiyan canapue cua saquiriojoquiaarini, taamueca pueyate nijaniyani. Naacuajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacuajitij, cua pohu-atasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhuj. Cante cua tojijiaa quiriini, nojuajaari cua Jiyarona tojijiaa quiriijuhuj.

Jesu pohuatasacari, Judascujaari na paraa na quia-teriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canatej, jiyanohua na taraajenuta naa canaa sequereeri:

—Seetanujuanaa nia sequeyanijia, niquiriyatu nijaniyajinijinoori cua paraa cua quiatenutaniya.

²² Canaari jiyacari tama niqutiooreejaanijia. Ma-
jaari canaa niishiniu quiriquiaa canajiniji naa Jesu se-
queriquiaani. ²³ Jiyacaritij, janiyari na shuriucuai ca-
jiriquiaa miaquenuujajiniani, na panishano pueyano
cua quiniuucua. ²⁴ Naaratej, Simón Pedroori cua
mashiniquirii sanaa cua nequesotanura Jesu, canajiniji
naa na sequereeni. ²⁵ Naarate janiyari Jesuucua tatereeni,
jiyasohuaja cua nequesotanura nojuaja. Janiyari naa na
sasacareeni:

—Jiyaniijanaa, ¿canteeri naa quia miiniutianiyani?

²⁶ Jesuuri cua riucaaree:

—Janiyari pan rau piquiojonutaniya caacajiniani. Cana
cua niqutionutaniyani, nojuajaari cuno.

Jesuuri jiyacari pan rau piquiojoree. Judas Iscariote
na niqutioereeri. Nojuajaari tamonu Simón jyanishano
niyanu. ²⁷ Judas masesacari cuno pan rau, Satanásri
noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia
miirinioj.

²⁸ Canaa na saquiriojosano pueya nata miaquenu-
uriquiaani, majaari quenaaja canaa niishiniu quiriquiaa
casaara naa Jesu sequeree Judasni. ²⁹ Judasri canaa
cumaneeca cojuatana quijia. Naaratej, noojiaqueya
canaajininioori jyaniriquiaani Jesu naasucua na ji-
yaroriquiaa socua casaa na masenura canaa querana-
cunuutajara, casamijiuniucua na niqutiojonura cuma-
neeca soj. ³⁰ Judas jaara masequiaari Jesu niquti-
tiosano pan, jiyacari tohuataqueeri. Tariucua niucuaari
quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaque-
etasaanutaniyani. Pueyasoori jyanohua maniniuhuaque-
etasaanutaniyajuhuj, naa cua miishanojiniji. ³² Pueyaso

jaara maniniuhuaqueetasaare naa maninia cua miiniuucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. ³³ Quiquiohuaniyojuanaa, janiya rupaquijia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaani-uhuj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitioojuaca nia quiri! Naatej, taa cua paniquiaacuaa nijaniyani, naa nia panitioorejuhuaj. ³⁵ Naa jaara naa panitioojuaca quiri, puetunu Pueyaso niishiyashijaca pueyajaanaari naacuaji niishiniutianiya, niaari cua tojitiajaca pueya.

*Jesu pohuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)*

³⁶ Simón Pedroori jiyacari Jesu nequesotaree:

—Jiyaniiijanaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhuajiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyaniiijanaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijioataaree quiocuarani.

³⁸ Jesuuri na riucuaaree:

—¿Naatee? ¿Quiaate tama quia cuaqueyajaaja tarinijioataaree cucuara? Janiyari seetanujuanaa quia sequeyani: juhuaquenu panishacari caacaraja niunijiyaquishacarijia, quiaari jiyacari cucuaji seetanu pacutejonutaniya tari.

¹ Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasocua nia tiuuri. Cucua nia tiuurijuhuaj. ² Cua Que tiaari puereetuuca. Queraatia quiqiuoori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura.

³ Cua jeenucuanu nuhuaji nia quiqiuora, janiyari niaacua tacatenutaniuhuanu, cua rijionuhua niajaniya, cuata nia quiniuriajuhuaj tee cua quiniutaniyacuaani.

⁴ Niaacuajaari cua quiqiuojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucuaaree:

—Janiyacuaajaari cuno nuuni, Pueyasocua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya rpueteja Pueyasoni, nojori tiuushacari cucua. ⁷ Niaa jaara seetanujuanaa cua niishiquiaaricuaa, niaa maara cua Que niishirijiuhuaj. Seetanujuanaa, niari tari na niishiyacuaaja. Niaari na niqiquiaajuhuj.

⁸ Felipeeri na sequeree:

—Jiyaniijianaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaaree:

—Felipena, janiyacujaruhua pueyaracaanu niaata quiqiuiaa juucuaani. ¿Majateeri juhuanajuaja quia niishiniu janiya? Cante cua niqiquiaani, cua Que niqiquiaajaariuhuj. ¿Casaara quia sequeya cua niq-uitiniuria cua Que niajaniyarini? ¹⁰ ¿Majateeri quia

tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua? Canaari maja rimiajatani. Nio, cua sequesano niajaniyani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari niajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiya-juhuj. Cua tacasacarihua cua Que shuriucua cua quinihuara, cucua tiuujiaaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua quishacari, janiyari niaara miiniutianiyanian puetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miijia. ¹⁴ Nioojia rupuetoosacari coojiata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ Niaa jaara seetanujuanaa cua panijiaa quiri, niaari cua rootasano tojitiajaca quiniutianiya. ¹⁶ Naajuhuj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriquireano. ¹⁷ Nojuajaari Pueyaso Sohuanu, seetanu rupaa jitianajanaa. Pueyaso tojiyashijia pueyari maja na naata cuno Sohuanu na jitianu, nojori niquiyaquiniucua nojuaja, na niishi-tiuyaquiniucua nojuajuhuj. Niaa cutaraari na niishijia. Nojuajaari niaata quiyacuaja. ¡Pueyaracaanu nioojiajinia quiriquireanojaariuhuj!

¹⁸ Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. ¹⁹ Pueyaso tojitiaashijiaca pueyari quiari naataja cua niquiyaquiniutianiya socua. Niaa cutaraari cua niquijiaca quiniutianiya. Samiitianijiojua cua quiniucua, niaari pueyara-caanu quijiaca quiniutianiyajuhuj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejacajuhuj. Janiyari saniniuujia nioojiajinia quijiani. ²¹ Cante cua rootasano niishijiani, nojuaja jaara na tojijia quirijiuhuaj, nojuajaari cua panijia cutara. Cante cua panijiani, cua Queeri na panijia quiniutianiyajuhuj. Janiyari na panijia quiniutianiyajuhuj. Janiyari cua panijiaaqua niniutianiyani, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucatej, nojuajaari Jesu nequesotaree:

—Jiyaniijianaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

²³ Jesuuri na riucuaaree:

—Cante cua panijiani, cua rootasano tojijiajaariuhuj. Cua Queeri jiyano pueyano panijia. Naaratej, canaari nocua niniutianiyani, noojiajinia canaa quiniuria, canaa quiquiora canaa jiyatenura nojuaja. ²⁴ Saniniuujia, cante cua paniaquijiani, jiyano pueyari cua rootasano tojiyashijiacajuhuj. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

²⁵ Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanoju-

naa niajaniya. Naajuhuj, nojuajaari nia niishitiniutiani-uhua puetunu tari cua pohuatasano niajanijajanaa.

²⁷ Janiyari nioojia cajitiniutianiyani. Janiyari coojia nianutaniya nioojiajiniani, juhuajaniya quijiaca nia quiniuria taa cua quiyacuaani. Naacuajitij, niaari seetanujua-naa juhuajaniya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaaniu. Majaari puerenujuhuaj. ²⁸ Tari nia sequereecuajanjia: “Janiya quera quiohuani. Janiyari na nuhuaji tacatenutaniuhuani niaata cua quiniuria”. Naa jaara seetanujuaanaa cua panijiaca quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijiajanaa cutara janiyajiniji. ²⁹ Janiyacuajaari juhuacarijia nio nia sequeyani. Naacuajitij, niaa jaara niquiri tohuateyano cua sequesano niajaniya, niaari niishiniutianiya puetunu cua pohuatasanojuanaari seetanujuaanaa.

³⁰ Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacuajani. Nojuajaari Pueyaso tojitiaashijiaca jiyaniijia. Pueyaracaanu cua Que Pueyaso tojijia cua quiniuucua, cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara.

³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjiani, na panijia cua quiniuucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pohuataquiaari socua canaa niquiara:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucua-jinijinio jaara muetuyashijia quiri, cua Queeri na piyotaja. Teyano cua cashacucua-jinijiniote muetujua saniniunijia, cua Queeri na nacareetaja, socua queraatia na muetunura. ³ Nia tojiniuucua cua rootasano, niaari tari juhua nacareetasano quiya. ⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijia quiri.

⁵ Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatucuasaarohuari manijinia quejoosocoriquiano. Tii cateyari.

⁷ Naa jaara coojia rupuejaca quiri, niaa jaara cua rootasano tojijaca quirijuhuj, puetunu nia panishanoocarajanaa nia secojore Pueyaso. Nojuacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanoehua timitiasaanutaniya. Naacuajitij, niishishaanutaniyaariuhua niaari cua tojitiajaca pueyaniyujua. ⁹ Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panishanoni, pueyaracaanu cua miiniuucua na panishano. Naajuhuj, niaa jaara cua rootasano tojijaca quiriquia, niaari pueyaracaanu cua panishano pueya quiniutianiyajuhuj.

¹¹ 'Janiyari naa nia sequeyani, shuquiriaatia quijiaca nia quiniuria, taa shuquiriaatia quiija cua quiyacuaani. Naacuaajitij, niaari tojetaarucujanaa shuquiriaatia quijiaca quiniutianiya. ¹² Cua tojiri. Nioori cua sequesano niaara: "¡Pueyaracaanu panitioojuaca nia quiriquia, taa cua paniya niajaniyacuaani!" ¹³ Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanujuanaa jiyanoehua narta pueya panijia. ¹⁴ Naa jaara cua sequesano miijiaa quiri, niaari cua rupuenaa. ¹⁵ Naacuaajitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiarijia nia sequeya cua rupueaatani, cua niishitiniuucua niajaniya puetunu cua Que sequesanojuanaa janiya. ¹⁶ Majaari nia saquiriojonu quiquiaari janiya. Janiya cutaraari nia saquiriojoquiaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhuanaj. Naaratej, cua Queeri puetunu nia masesanajuanaa nia niquitionutianiya seetanujuanaa coojia rupuejaca nioojia quishacari. ¹⁷ Janiyari cunora nia sequeyani: "Pueyaracaanu panitioojuaca nia quiri".

Pueyaso niishiyashijiaa pueyari Pueyaso muerasu niquiniu paniyashijiaa

¹⁸ 'Pueyaso niishiyashijiaa jaara nia niquiniu paniaquiriquia, majaari nia tacaaniu. Cuno pojoricuaajaari naa cua niquitiuniu paniaquijiacacuaa. ¹⁹ Naa jaara Pueyaso muerasu quiaquiriquia, Pueyaso niishiyashijiaa maara nia panijiaa quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiaa quiquiaarijuhuaj. Naajaa,

janiyari nojori tajiniji nia saquiriojoquiaarini, cua pueya nia quiniuria. Cunora, Pueyaso niishiyashijiacaari nia niquiniu paniyaquiquiaa, maja tari nia quishacari juhua nojori. ²⁰ Majaari nio cua sequesano nia niyajetanu: “Seruuri maja socua tojishano na camarnujiniji”. Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuhuj. Naajuhuj, nojori jaara cua rootasano tojiquiaacuaa, nojoriiri nia rootasano tojijiaca quiniutianiyajuhuj. ²¹ Nojoriiri naa naquiya miiniutianiya nijaniyatej, cua pueya nia quiniucua, nojori niishiyaquishacari cua Jiyarona.

²² 'Janiya jaara niaquiquiaari nojori cua pohuatanura Pueyaso rupaani, nojoriicuaa maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: “Cua jiyanoori. Maja cua niishiniu quiquiaari quia rootasano”. ²³ Cante cua niquiniu paniyashijiani, nojoriiri cua Que niquiniu paniyashijiajuhuaj. ²⁴ Sesa nojori miishano maara nojoriicuaa saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniyaquijiaca, cua Que niquitiuniu paniyaquijiacaariuhuj. ²⁵ Naajaa, naa nojori miiniucua janiyatej, tariucuaaanu Pueyaso Rupaajinia naajiotasano janiyajinijiiri tari tohuateeree. Naa sequeyari:

“Janiyari najuhuana niquiniu paniyaquishiyani”.

²⁶ 'Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari

seetanu rupaajanaa jiitiaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhaaj, pueyaracaanu cuata nia quiniuucua shushajanaa cua coteesacari pohuatanu Pueyaso rupaa.

16

¹ Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuaj cua tojitiajaca nia quiniuucua, nojoriiri jiyaniutianiya nojori maninia miya Pueyasora, naa nojori miishacari. ³ Nojoriiri naa miiniutianiya nijaniyatej, nojori niishiyaquiniuucua janiya, cua Quejuhuaj. ⁴ Janiyacuajaari juhuacarijia naa nia sequeyani. Naacujitij, niaa jaara naquiya miishaare, niocua jiyacari niishiri janiyacuajaari tari naa nia sequequiarini. Majaari quenaaja nio cua sequenu quijia nijaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ 'Quiarjiani, janiyari cua Jiyaronaacua quiohuani. Quiarjiani, majaari quenaaja nijaniyajinijinio nequesotanu janiya: "¿Tee quia quiohuarini?" ⁶ Janiya jaara nia sequereeni janiya quianutaniuhuani, niaari saaja taraajequee. ⁷ Seetanujuanaa nia sequeyanijia, socua maninia quiniutianiya niaaraari, janiya jaara quiaarohuani. Janiya jaara quiaaquiyaarohuani, majaari Pueyaso Sohuanu niniu quiniutianiya niaacua, na cumaquiniuria nijaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujiajinia poonijionutaniya, nojori na niishitiniuria nojoriiri seetanujuanaa sesa miijiaca. Nojori niishitiniutianiyajaariuhua nojoriiri na naata sesa

miyashijiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojinia quejoonu. ⁹ Seetanujuanaa, Pueyasora, nojoriiri sesa miijica nojori tiuyaquiniuucua cucua. ¹⁰ Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacujitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. ¹¹ Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutianiya. Naacujitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniuucua.

¹² Janiyari queraatia jiiitiaajaa cua pohuatanura niajaniyani. Naajaa, majaari cua pohuatanu quiniutianiya quiarijia niajaniya. Juhuanujuaja maja nia naata na niishiniu. Pueraruhua. ¹³ Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiiitaja. Nojuajaari maja tama na niishishanojuaja na niishitiniu quiniutianiya niajaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. ¹⁴ Niaari cua shuquiritianutianiya, nojuaja niishitiniuucua niajaniya janiyajiniji. ¹⁵ Puetunu cua Que jiiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutianiya cua jiiitiasano niaara, na caminiujuniuria niajanijarajuhuj.

¹⁶ Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuuhuj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquiriojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarjia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu panijajaanuhua na sequesacari: “Pasa naataja na nuhuaji niaari cua niquiniutianihuacuhuj”, na sequesacarijuhuaj: “Cua Queecua quianutaniuhanijia”? ¹⁸ Naajuhuj, ¿casaa na sequeyarini na sequesacari “quiarjiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarjia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj”. ¿Niaatejaara niojiniji nequesoreetoya tama nijaniyajaaja? ²⁰ Seetanujuanaa nia sequeyanijia, niaari nujuquenutaniya. Niaari taraajeconutaniyajujuaj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa nijaniyajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarjiani, niaari naa taraatia quiyajujuaj. Naajaa, niaacua tacatenutaniuhanijia. Niaari jiyanohua shuquiriniutianiya nia niquishacari janiya. Majaari quenaaja tamasa pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua

Queeri nia niqutionutaniya puetunu nia masesanajuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanojuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secjoretej. Niocua nia panishano niqutiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secjonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojiniuria niajaniya. ²⁷ Cua Quejanaacuajaari nia panijia, nia paniniuucua janiya, nia niishiniuucua-juhuj janiyari na jiyarosaroni. ²⁸ Niaacuajaari niishiya, janiyari cua Que shuriucuaji niquiaarini pueyanora cua quiniuria mijiria. Quiarijia saniniuujia, janiyari nio jiya tiujianutaniyani, cua Queecua cua quianuhua.

²⁹ Naa Jesu sequesacari canaatej, canaari na sequereeni: —Quiarijia cutara, quiaari maatiajanaa sequeree, maja miriqui. ³⁰ Quiarijia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacuajitij, canaari niishiyani, quiaacuajaqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiyuruhua? ³² Tari quenaacoyari naquiya cua miishaanura. Seetanujuanaa quiarijiaari. Niaari cucuaji cocuatasanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuajaari cua cojiyani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiushacari. Mijiria nia quishacari, niaari seetanujuanaa

naquiya miiniutianiya. Naajaa, janiyacuajaari mijiria jiyaniijia shocotareeni. Naacujitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quena, janiya nio juuca naquiya miishaanutanianiyani taa quia sequequiaaricuajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacujitij, janiyacu saniniuujia quia jiyatere pueya timitiasano quia quiniuriani, tojetaarucuajanaa maninia miiijia quia quiniuucua.

² Quiaacuajaari quia cumaaca cua niquitioquiaari puetunu pueyajanaa cua jiitianura. Naacujitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niquitioquiaari janiyacua-jani. ³ Nojori niishishacari saaja quiajaniyari seetanujanaa Pueyasocuaja, naajuhuj, nojori niishishacari janiyari quia jiyarosanoni, naacujitij, nojoriiri pueyaracaanu quijiara quiniutianiya shuquiriaatia.

⁴ 'Janiyari tari tucuataree quia sequesano cua miiniuria mijiriani. Naa cua miiniuucua puetunu quia panishanojuanaatej, pueyari quia timitiaa. ⁵ Jiya shipiniyaquishacarijia, janiyari jyanohua shuquiriaatia quijia quiquiaari quia shuriucuan, jiyaniijajanaa cua quishacari. Cua Quena, naa quijiara cua jiyaterohua quiarijiani, quia shuriucua cua quiniuhua.

⁶ 'Quia niquitiosano pueya janiya, quia saquiriojosano pueya quia niishiyashijiaca pueyajinijinioni, quiarijia cutara, nojoriiri niishiya cante quiajaniyani. Nojoriiri quia niishiya, nojori niquiniuucua cua miiijosano quia cumaacata, cua pohuatasano quiajaniyajiniji nojori tojiniuucujuhuj. Nojoriiri quia pueya quijia. Quiaari

saniniuujia nojori cua niqutioquiaari. Nojoriiri quiarijia quia rupaa tojitiajaca cutara. ⁷Nojoriiri niishiya puetunu cua jiitiasanojuanaani, cunoori quia niqutiosano janiya. ⁸Janiyari quia rupaa rootacanu nojorini, quia niishitishano janiyani. Nojoriiri seetanujuanaa nocua tiuurii. Nojoriiri seetanujuanaa niishiya, janiyari quia shuriucuaji niquiaarini. Niishitiuyajaariuhuj, janiyari seetanujuanaa quia jiyarosanoni.

⁹Janiyari cunora nojoriicuara quia secojiyani, seetanujuanaa quia pueya nojori quiniuucua. Majaari cua secojonu quia niishiyashijia pueyacuara. Saaja noo pojoriicuara quia secojiyanijia, quiaa na niqutioquiaari janiyatej. ¹⁰Naaratej, puetunu cua jiitiasano pueyajanaari quia pueyajuhuj. Mariyata puetunu quia jiitiasano pueyajanaari cua pueyajuhuj. Nojori tiuuniuucua cucua, nojoriiri jatanishano pueya quiniutianiya. Naacujitij, queraatia pueyari cua timitianutaniyajuhuj, naa nojori niqishacari cua cumaaca.

¹¹Majaari puera cua tarishiniu quiniutianiya mijiria. Cua pueya cutaraari mijiria quiniutaniyajaa, janiya jaara quiaarohua quiocuani. Jyanohua maninia cua Quena, nojori quia cojuare quia cumaacata, teyano pojori quia niqutioquiaari janiyacujani. Naa quia jiitiare nojori, jatiqui nojori quiniuria juhua niquiriyatu jiuujaraca, taa pa quiyacuaani. ¹²Mijiria cua quishacari nojoritia, janiyari nojori cojuajani quia cumaacata, quia rupaacua tiuujia nojori quishacari. Majaari quenaaja niquiriyatu nojorijinijinio cua juurequetenu quiquiaari. Saa noojuuari juurequecanu cutara, tariucua juurequeriquiano quijiacujatej. Naacujitij, tariucuacaanu quia rupaajinia naajiotasanoori tohuatecanu.

¹³Quiarijiani, janiyari quiocua quianutaniyani, tee quia quiyacuaani. Niya cua quishacarijia, janiyari nio sequeya nojori niquiarani, nojori jiitianura cua shuquirinijuuhuj, tojetaarucujanaa shuquiriaatia quijia nojori

quiniuriajuhuaj. ¹⁴ Janiyari nojori niishitiocanu quia rupaani. Naa nojori tojishacari quia rupaatej, quia niishiyashijiaca pueyari nojori niquiniu paniyaquiquiaa. Cua pueya nojori quishacari, nojoriiri maja saaja mijiria quijiaca na quiniu tari, taa janiyacuaani. Naaratej, mijiria quijiaca pueyari nojori niquiniu paniyaquiquiaa. ¹⁵ Naa cua secojosacari quiarimia nojoriicuaratej, majaari cua sequenu quiajaniya nojori quia rijionura niiquiji. Saaja quia secojiya cutaranijia, nojori quia cojuanura Sesaacaacuaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajinijinio cua quiyaquiyacuaani. ¹⁷ Quia rupaa quia poonijiotere nojori jiuujijinia, tojetaarucujanaa quia tojijiaca nojori quiniuria. Quia rupaari seetanu rupaajanaa cutara. ¹⁸ Quiaacuajaari cua jyaroquiaari mijiria quiniaa pueya niqiara cua pohuatanura quia rupaa. Naajuhuj, janiyari cua pueya jiyaramiquiyani mijiria quiniaa pueyacuajuhuj. ¹⁹ Quia tojijiaca nojori quiniuria seetanujuanaa, janiyari tama cua cuaqueyajaaja jiyateya puetunu quia panishanojuanaa mijia cua quiniuriani. Naacuajitij, nojori niishishacari seetanu rupaajanaa janiyajiniji, nojoriiri tojetaarucujanaa maninia mijiacara jatanishaanutaniya.

²⁰ Majaari saaja cua secojonu nio pojoriicua, tariucua quia tojitiajacuaani. Janiyari secojiyajuhuj na nuhuaji cucua tiuuriquiano pueyacuara, noo pojoriicua cante cucua tiuniutianiya na nuhuajini, nojori tojishacari nio pojori pohuatasano janiyajiniji. ²¹ Cucua tiuuriquiano pueyacuara secojiyanijia puetunu cucua tiuniaajanaa cuaara quiiria jatiqiu, juhua rupuetootesano, taa pa quiyacuaani, cua Quena. Naatej, taa cua quia quioojajiniacuaani, quiaari saniniuujia coojiajinia quiyacujua. Nojori jiuujia cuaara juhua rupuetootesano quiiria poojiatajuhuaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaquiya quia Sohuanutani, quia niqitiosano janiyacuaa, juhua niquiriy-

atu jiuujiaraca nojori quiniuria, naatej, taa niquiriyatu jiuujiaraca pa quiyacuaani. ²³ Quiaari coojiajinia quiya. Naajuhuj, janiyari nojori jiuujiajinia quiyajaacuhuj. Naacuajitij, paari nojoritia juhua niquiriyatu quiniutianiyani. Naacuajitij, mijiria quijiacaari niishiniutianiya, quiaari seetanjuanaa mijiria cua jiyaroquiaari. Nojoriiri niishiniutianiyajuhuj, quiaari jiyanoehua cua pueya panijia, taa quia paniya janiyacuaani.

²⁴ Cua Quenaa, cuno pueya quia niqitiosano janiyani, janiyari paniyani nojori quiniuria cuata quia shurucua, nojori niqiniuria cua shacantuuca cumaaca. Quiaari cuno cumaaca cua niqutioquiaari pueyaracaanu quia paniniucua janiya, jiya shipiniyaquishacarijia. ²⁵ Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhuj, janiyari seetanjuanaa quia jiyarosanoni. ²⁶ Janiyari nojori niishitiocanucujani cante quiajaniyani. Janiyari naa pueyaracaanu nojori jiuujiajinia niishitiniutianiya quiajaniyajinijini, seetanjuanaa nojori niishiniuria quiajaniya. Naacuajitij, taa quia paniya janiyacuaani, nojori cuara cuno paniniu jiiitaara nojori jiuujiajiniajuhuj. Naa nojori niishishacari quiajaniyatej, janiyari nojori jiuujiajinia quiniutianiyajuhuj.

18

Na paraa quiasacari Jesu

(Mt 26.47-56; Mr 14.43-50; Lc 22.47-53)

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari maticosano quijia puetunu na shocujanaa. Jesuuri tii tiuquitiamaa canaa, na Que Pueyaso na secojonura.

² Jesuuri tii jiiitiquiaari canaata na rerejonura.

Naacuajitij, na paraa na quiateriquiano Judasri cuno cuhuariquia niishiquiaarijihuaaj. ³ Canaa quishacari tii, Judasri jiyacari soldadohua tiuquitiasee, Pueyaso Secojojua tia cojuanaa pueyanio. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyanio. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacainiji tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuarree:

—Canaa Nazaret tiacajinijinio Jesu pajeyani.

Jesuuri nojori riucuarree:

—Janiyacujaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacujaja nojuajani”, na paraari na nijiniara pojotuquee. ⁷ Jesuuri socua nojori nequesotaro-hua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuarree:

—Janiyacujaja tari nia sequereeni, janiyacujaja nojuajani. Niaa jaara cua pajeya, nareja nia niquiri nio, cua cojiniaani.

⁹ Naacuajitij, tama Jesu sequesanojuaarijia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niquitiosano pueyajinijinio janiya”.

¹⁰ Jiyacaritij, Simón Pedroori tama na mueruujuaaja shitiaree na shuucujaji shiyano. Nata, pueyacuara secojonaa jiyaniijia seru numoco jaatereeri, na

miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tariniti-aaquiri naquiya cua miishaanurani? ¡Taaquiririnij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijajuhuaaj, Pueyaso Secojoua tiaco cojuanaa pueyano. Nojoriiri Jesu morojoturee. ¹³ Na nuhuaaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quiniucua. Cuno marijiaara, Caifásri pueyacuara secojonaa jiyaniijiajanaa quiriqiaa. ¹⁴ Cuno Caifáscuajaari tari naa sequequiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijanaa, maja najuhuaana puetunu pueyajanaa puecoosaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhujiriquiaa tucuaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuateyaji jateesee. Jiyaniijiajanaa niishishano pueyano cua quiniucua, janiyari tohuateyaji cojuana niyacoota pocoojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuaree:

—¡Maja janiya!

¹⁸ Shiniquiaari jiyacari jaanujuriquiaa. Nocuaji cuno jiyaniijia seyari Pueyaso Secojojua tiajinia cojuanaa puey-ata mani naatequiaari. Nojoriiri na jitiuriquiaa. Pedroori nojoritia tii quiriquiaajuhuj. Mani jitiuriquiaari.

*Pueyacuara secojonaa jiyaniijia nequesoreesacari Jesu
(Mt 26.59-66; Mr 14.55-64; Lc 22.66-71)*

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreeree-jaariuhuj. ²⁰ Jesuuri na sequeree:

—Janiyacujaari pueyaracaanu puetunu pueya niquiarajanaa maatia niishitiojoquiaani. Janiyari pueyaracaanu tiquiyocua Pueyaso secojonuujuaca tiacajiniaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojojua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuate cua pohuatasano tojiquianuni. Nojoricujaari quia sequenutaniya casaa cua rootaquiaa nojorini.

²² Jiyacaritij, Pueyaso Secojojua tiaco cojuana pueyanoori Jesu shuriucua nujuariquiaa. Naa Jesu riuucasacari jiyaniijia Anástej, Secojonuujuua tiaco cojuana pueyanoori Jesu jiquioco maseteree. Naa Jesu sequereeri:

—¿Naa riuucasante pueyacuara secojonaa jiyaniijia?

²³ Jesuuri na riucuaree:

—Janiya jaara sesa riucuareeni, cua sequere casaate sesa quiriini. Saniniujia, janiya jaara maninia sequereeni, ¿casaara quia maseteree cua jiquiocuaraarini?

²⁴ Canaa pueyacuara secojonaa jiyaniijijanaa Caifás quiniuucua, jiyacaritij, Anásri Jesu moronucua jiyarotaree Caifásqua.

Pedro pacutesacari seetanu Jesujiniji

(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaajaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj?

Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriqúiaa, Pedro jaatesano na numocotej. Nojuajaari Pedro sequereee:

—¡Janiyacuajaruhua quia niquirii cuno pueyanota quia quishacari olivo cuhuariquiajiniani!

²⁷ Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoreesacari Jesu

(Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaaquiaari Romano jiyaniijia tiajinia. Cuno tiaari jiyanohua puereetucua quiriqúiaase, jiyaniijiaacuaji tiasano. Cuno jiyaniijiani, nojuajaari Romano jiyaniijijanaa César jiyatesano quiquiaari jiyaniijijanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niqiara, nojori tiuquitianuucua tahue tiajinia. Nojori

jaara juhua curuutuuca quiri Pueyaso niquiara, naacua-jitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuaaree:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequere:

—¡Niiquiji nia jiyataarohua! ¡Tama nia nequesoresuhuaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaaree:

—¡Niajaniya Romano pueyani, niaacuajaari canaa sequecanu maja canaa monura pueyano!

³² Naacuaajitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia.

³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate seetanujuanaa Judiocuaca jiyaniijia?

³⁴ Jesuuri Pilato sequere:

—¿Cunote tama quia niishishanojuaaja naa quia nequesotanura janiyatej? ¿Tamonu soj quia pohuatacanu janiyajiniji?

³⁵ Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacuajaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

³⁶ Jesuuri na riucuaaree:

—Janiyacuaajaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriqiuani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niquiaarini seetanu rupajanaa cua niishitiniuria pueya. Cante seetanu rupajanaa panijiani, nojoriiri cua sequesano tojitiajaca.

³⁸ Pilatoori najuhuana na nequesotaree:

—¿Casaateeri cuno seetanu rupajanaani?

Naa na nequesotanu nuhuajitij, Pilatoori tohuatamohuacuhua canaa Judiocuacaacia.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecuajaniijia. Nojuajaqui maja sesa na miiniu quiqiuani. ³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiarijiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyanohua nacoorohuacuajaj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua majacuteree Jesu, coqueeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaatiniuria, shaaruque toque cushitishaarohuari,

juhua jiyaniijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judocuaca jiyaniijianaa! ¡Quia timiri, Judocuaca jiyaniijianaa!

Naa nojori sequesacari Jesutej, nojoriiri na jiquioco piquitiurii.

⁴ Pilatoori socua tohuataquiaari canaa Judocuacaacua. Nojori sequereeri:

—¡Nia niquiri! Janiya na tohuateya niaacuani, nia niishiniuria janiyacuaja tari na nequesoreereni. Janiyari quiarjia niishiyani, nio pueyanoqui maja sesa na miiniu quiriucuaa.

⁵ Jesu muetasacari nojoriicua, juhuacontucujiniji nacaque cushiriquiaari, shaaruque toquenio. Pilatoori Judocuaca sequereeri:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuaaj, nojori jaara Jesu niqiquiaari, na nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuarere saaja:

—¡Maja! ¡Janiyacuajaari niishiyani, nio pueyano maja sesa na miiniu quiqiuana! ¡Niaa jaara na monu paniri, nia teetere tama nijaniyajaaja!

⁷ Canaa Judocuacaari Pilato riucuarere:

—¡Canaari Pueyaso Rootasano naajionee jiitiaani! ¡Canaari cunojiniji niishiyani, nio pueyano cuara mosaaria tama na cuaqueyajaaja na jiyatenuucua Pueyaso Niyamura!

⁸ Pilato tojishacari naa canaa Judocuaca sequesantej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniani?

Jesuuri maja na riuquanu quirii. ¹⁰ Pilatoori na sequeree:

—¡Cua riuquarejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajaniya! ¡Janiya jaara paniyaquir-ijiuhuj, cua naata quia cartenujuhuaj!

¹¹ Jesuuri saaja na riuquaree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paare-taquiri cucuj. Naaratej, cante niyara cua nitiamaa quiocuani, nojuajaari socua jiyanohua sesa miirii quia-janiyajiniji.

¹² Naa Pilato tojishacari Jesu sequesantej, nojuajaari socua shiriiquiquiaari. Nocuaji, Jesu cartenu saniniuji-uriquiaa juucuaari. Judiocuacaari saa nacoorejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyani-ijiajanaa César rupuena quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesaquiji cajitiujinia. Pilato tii cajiriquiaani, na tacoji pueya nujuatusaquini, cunoori shanohua saitia shipin-ishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniuu-jia, cunoori quiquiaari “Gábata”. ¹⁴ Jiyacariiri panacari quiriquiaa. Cuno juuca, canaa Judiocuacaari juhuacarijia jeenucariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

¹⁵ Pueyari saa nacoorejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcuajaari canaa jiyaniijiajanaa! ¡Maja socua tamonu jiyaniijia canaa jiitianu!

¹⁶ Pilatoori socua Judiocuaca niquitioree Jesu, nojori teetesocoriquiano. Naaratej, nojoriiri na jiyataquiaari na teetenuuca.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniuujia, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree.

¹⁹ Pilatoori naa naajiotequiaarijuhuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”.

²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejajaaja, Judiocuaca jiyaniijianijia”.

²² Pilatoori nojori riucuaaree saaja:

—Janiyacujaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu

tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacujitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuaa tacuarishiyonuureeri, na pasocoriquiano”.

Seetanujuanaa, naa miitiuquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuj, María Magdalenanio.

²⁶ Jiyanohua Jesu panishano pueyanoori Jesu nucua shuriucua nujuariquiaa. Cuno pueyanocuaaari janiya. Jesu niquishacari canaa, na nucua sequereeri:

—Maajiniaa, cua panishano pueyano cuara quiiria juhua quia mueya cua niti.

²⁷ Na nuhuaji, cua sequereajaariuhuj:

—Juannaa, cua nucua cuara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri niishiquiaari puetunu nojuajiniji naajiotasanojuanaari tari tohuateeree. Naajuhuj, tariucuacaanu Pueyaso Rupaajinia naajiotasano tohuateenu-rajuhuj, Jesuuri sequequiaari:

—¡Jiyamueyanijia!

²⁹ Cuniqi, vino jerecaari patacojinia mishaja cajitiariquiaa. Jiyacaritij, namasu casaari jereca vinojinia shishaaree. Naajuaacua na morotatureeri. Na nuhuaji,

Jesu rupaama shitiasaareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuatarae puetunujuanaacuajanijia!

Naa na sequenu nuhuajitij, naniquiiri. Cusoqueeri.

Soldado jitiyacari Jesu shuucuaji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacuara juucajinia. Cuno marijara, Pascua juucaari Sábado juucajinia quiriquiaajuhuj, samaatenu juuca. Naaratej, canaa Judiocuaca camarucuaari maja na paniniu quiriquiaari samaatenu juuca macunucua jaasuconura na niyacutesanojinia. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusuunura, na roshinijosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatureejaariuhuj. ³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaquirii.

³⁴ Naajaa, tamonu soldadoori Jesu shuucuaji jitiaree na cashanata najuhanaj. Ritia shooqueeri nanaca, mohuacanio. ³⁵ Cuno pueyano, na naajiojinia naa nia pohuataani, cunocujaaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaaritia niishiyani cua sequesanoori seetanujuanaa, nocua nia tiuuniuria. ³⁶ Jesuuri naa miishaaquiaaritia, tariucuacaanu nojuajiniji naajiotasano tohuateenura. Naa sequeyacuajaari juhuacaritia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiri nojuajiniji naa naajiotasano quiyajuhuj:

“Cashanata na shuucujaji na jitiatusano niqutiuniutiyan-yari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato sequesee:

—Cua niqutiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹ Nicodemojuhuaj, noo pueyano Jesuucua niqiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niqiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijiosano. ⁴⁰ Joseeri Nicodemota Jesu jiuniocoree toqueneecajinia. Nojori jiuniosacari, nojoriiri nocua nojoriquiaa cuno shanohua jaanutaja. Canaa Judiocuacaari naa miitiujiaca quiquiaari, na macu na niatunura raaco. ⁴¹ Tee Jesu teetesaaquiaaricuajani, cuniquijia na shuriucua quiquiaariiri cuhuariquia. Cuno cuhuariquiajiniani, quiarinio jiuutiasano raari quiriquiaa, macunucua niojuuara. Cuno raaconi, juhuanujuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniucua. Naajuhuj, quera puequeriquiaari canaa Judiocuaca jeenucanu juuca. Cunoori, Pascuaacuara juuca.

20

Jesu samiitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquiicujaji quiaquiaari Jesu raajiniara.

Ninishiquiri quiriquiaajaa. Na tiuquishacari, cuno puereetuuca saajia niquishiiri tariucua tamocora ruutinishano, teyanota raa tiosaaquiaaricujani. ² Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquitijia na niasaaretejaj!

³ Naaratej, janiyari Pedrota netequiaari raajiniarajuhuj. ⁴ Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacujitij, janiyari coteenu tiuquishii raajiniani. ⁵ Janiyari raaco cuuqueseeni. Janiyari saaja Jesu jiunocotaja toque niquirii maanoni tee Jesu quete niasaarucuaacujani. Majaari cua tiuquiniu quimiaa raaco. ⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiunocotaja toque niquishii tii maanojuhuaj. ⁷ Jesu naca jiunocotaja niquirijiaariuhuj tamoco maano, maninia mariquiosano. Majaari na manu quiriquiaa Jesu cuaqueya jiunocotaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaajaaniuhuj. Cua niquishacari Jesu jiunocotaja toque, janiyari niishiquiini Jesuqui tari samiitiarohua. ⁹ Canaari juhuanajuaja maja canaa niishiniu quiriquiaa tariucuacaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji, canaari tiajinia quiaarohuani.

*Jesu muetasacari María Magdalenaacua
(Mr 16.9-11)*

¹¹ Canaa quiojosacariuhua raajiniji, María Magdalenaari tijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹² Raaco na

niquishacari, caapiqui Pueyaso seya niquiriiri, cohua-
jaque toqueyaraca. Nojoriiri macu niasaqui cajitiuriquiaa,
tamonu na nacaacora, tamonu na cashacuucumara.

¹³ Pueyaso seyari María Magdalena sequeree:

—Maajiniaa, ¿casaara quia nujuqueyani?

Nojuajaari Pueyaso seya riucuree:

—Cua jiyaniijia quete niiquiji pasaarucuaa. Majaari cua
niishiniu teeriquitijia na niasaarucuaatejaj.

¹⁴ Naa na sequenu nuhuajitij, na nijiniara tacatero-
huari. Saaja Jesu niquirii na shuriucua nujuaanoori. Maja
cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniaa, ¿casaara quia nujuqueyani? ¿Cana quia
pajeyani?

Maríari na jiyanirii cuno cuhuariquia cojuana pueyano
naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua
sequere tee quia niarucuaanoj. Janiyacua nocua quiaare
na panurani.

¹⁶ Jesuuri na sequeree:

—¡Maríanaa!

Jiyacaritij, Maríari nocua tacatequee na niishishacari
nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷ Jesuuri
María sequeree:

—Maja cua quianu. Juhuanajuaja maja cua tacanu
quiquioo cua Queecua. Quia quiaarohua. Cua tapuey-
ocuaca quia sequesuhua: “Janiya cua Que Pueyasoo-
cua tacanutaniuhuani. Nojuajaari nia Quejuhuaj. Nojuajaari
cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequeree na
tapueyocucata, na Que Pueyaso na jiyatesacari nojori
Quejuhuaj. ¹⁸ Jiyacaritij, María Magdalenaari nimiohua
canaacua, Jesu saquiriojosano pueyacuan. Nojuajaari

canaa pohuatasuhua taa Jesu na niquiriini. Naajuhuj, Jesu sequesano caminiujiurii canaaraari.

Jesu muetasacari na saquiriojosano pueyacu

(Mt 28.16-20; Mr 16.14-18; Lc 24.36-49)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaa-tiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimiaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

²⁰ Naa canaa na sequenu nuhuajitij, canaa niqitijioree na juaashiquiaari, na shuucujaji cashana jiyanio. Canaari jiyanohua timiriini canaa niquishacari canaa Jiyaniijia.

²¹ Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuhuj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³ Naa jaara pueyano jiyanoori sesa na miishanojiniji, seetanujuanaa jiyanooshano quiniutianiyari. Saniniuujia, niaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaariuhuj.

Tomás niquishacari Jesu, saminio seetanujuanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua.

²⁵ Naaratej, canaari Tomás sequequiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajiniya niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucujijihuaj, janiyari nia cuaracashitiniutianiya.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuni. Tomásri jiyacari canaata quiriqiaa cutara. Tia tiotiuuri maninia mishiquiojosano quiriqiaa. Naajaa, Jesuuri saaja canacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhujaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucujaji quia puerarejuhuaj. ¿Casaara cucujaji quia taacanuyajaani? Cucua quia tiuuri.

²⁸ Tomásri jiyacari Jesu sequeree:

—¡Cua Jiyaniijianaa! ¡Cua Pueyasonaa!

²⁹ Jesuuri na sequeree:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapute cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohua socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoretuneejinia naajiotasoo. ³¹ Janiyari secaja saquiriojoree niya cua naajiotasocoriquianoni, nia niishiniuria Jesuuri seetanujuanaa Pueyaso Jiyarosano, Pueyaso Niyanutuhuj. Janiyari nio naajioreeni nocua

nia tiuuniuria, Pueyaso muerasura nia jiyatesaanura, pueyaracaanu rishijiaca nia quiniuria.

21

Tiberias caminiajinia Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajinia. Naa quiquiaariti na muetasacari canaacua. ² Nio pojoriiri jiyacari mariyata quiriquiaa: Simón Pedro, Tomás (Caapueyano jiyaniishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaajaaniuhuj. Canaari Zebedeo niquiohuani. Socua caapiqui Jesu saquiriojosano pueyajinijinioori tii quiriquiaajuhuj. ³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareni:

—Canaa quiata quiaajuhuj.

Naacuajitij, canaari quiojiyareeni. Canaari botejinia tacataseeni. Canaari puetunu cuno niucujanaa shiyaru quejootariquiaa sapitiaajara juucuaani. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquiajinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Canaa nequesotareeri:

—¡Sanajooriniaa! ¿Niaate na quiaree?

Canaari na riucuaareni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria! ¡Niaari cuniqui na quianutaniya cutara!

Canaari naa miiriini taa na sequeree canaacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari. ⁷Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajania jaataareeri Jesuucua na quianura. Jiritiuri quiriquiaa. ⁸ Canaari na nuhuaji jaatiariquiaa shiyaru botejinijini. Jaaquiaari namitia maja tucuacaanu na quiniu quiriquiaa, saaja cien metroruhua. ⁹ Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. ¹⁰ Jesuuri canaa sequeree:

—Nia sapitiaajajiniji miji nia riri rarishocoriquiano.

¹¹ Simón Pedroori ritia botejinia tacamaa. Shiyaru tacanitiaree jaaquiajinaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucujaja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranojoni. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaarihuaj.

¹⁴ Jiyacari Jesu muetasacari canaa na saquiriojosano pueyacuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocojosacari Simón Pedrota

¹⁵ Canaa miaquenuunu nuhuaji, Jesuuri Simón Pedrota pocojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniyoyua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu.

¹⁶ Jesuuri Pedro nequesotarohuacuahuaj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoresacari nojuaja. Seetanujuanaa Jesu riucuaareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniyoyua cojuanara quia quiriqui.

¹⁸ Seetanujuanaa quia sequeyanijia, mashaja quia quishacari, tama quiajaniyajaarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutianiya na mosaanuucua. Na nuhuaji, Jesuuri na sequeree: —¡Pueyaracaanu cua tojijia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocuajani, canaa miaque-nuusacari Pascuara, Jesu shuriucua cua cajishacari na nequesotaquiaaritij: “¿Cantejaara cunoni, quia quiatenu-taniyani?” ²¹ Quiarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijijataj, taa na miishaanutaniyarini?

²² Jesuuri Pedro riucuree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jiyaniriquiaa janiya naasucua shaajeyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohua-jaatijia, quiajanियara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jiyanohua queraatia socua casaa miiquiaari na cumaacata mijiria. Puetunu na miishanojuanaa jaara naajiotasaare, naa naasucua

JUAN 21:25

112

JUAN 21:25

nio jiyajinia maara quiquio quiyaquiri puetunu cuno
nequesoretuneecaacuajijianaa.

Quiarinio pueyaso rupaa pa jiyaniijia Jesucristojiniji
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
